

洞真太上太霄琅書

經名：洞真太上太霄琅書。撰人不詳，約出於南北朝。原本十卷，現存九卷。卷一為經文，卷二缺，卷三至十為注訣、科儀及修持法術。底本出處：《正統道藏》正一部。

洞真太上太霄琅書卷之一

紫微夫人譔瓊文帝章

雲務子者，蓋元皇玉虛之胤，太帝之中子也。抱瓊胎於玉房，結雲精於金門，含日月於紫胞，變洪露以凝神，鍊胎息以推運，任歷劫以轉輪，化生於元氏，告陽道以成真。於是上皇元年三月一日，天暉啟晨，誕於九玄之上，寶耀无量之天，覩太陽於雲崖，曜金容於瓊軒，順皇基於帝圖，法玉秀於自然，濯以九靈之暉，灌以甘香玉泉，飲以靈妃皇芝，哺以九鍊飛霜，神龍翼其側，瓊鳳摩其顛，紫煙生子上，流光鬱于鄰，二象抗其綱，三晨協其真，神州歌其妙，七轉變其神，靈風迅其軀，迴香盪其塵，簫簫太虛之上，靡靡同波之濱。年冠二九，思微念玄，適性理運，任時推遷，不慕皇道，逍遙中原，遊娛太霄，徘徊紫天，流盼歷劫，得趣忘旋，運非我制，挺標上仙。遂名書帝簡，位登太真，三元下教，贈爵皇篇，於時受命，朝禮玉天，上登九玄之臺，大有之宮，紫鳳玉京，七寶硃房，於明霞之館，清齋玉軒，靈端告感，項負圓光，夜照神燭，自明瓊堂。於是虛皇道君，於空洞之上，玄虛之中，以《太霄琅書瓊文帝章》，降授於君。是時天光冥逮，三晨迴精，五宿改度，七元運靈，九色晃曜，煥絡玉清，飛煙翳鬱，流漫八冥，玉陛登階，萬帝臨庭，飛仙羽蓋，輔翼太真，仙童玉女，各主千人，執巾散香，流芳掃塵。於是命駕，檄召五靈，飛霄迴輪，乘空絡煙，神鳳挺轡，靈妃導仙，明皇啟路，三道合明，流電揚精，逸駕九玄，遊盼瓊闕，宴景三元，盤徊玉霄，適肆紫晨。於是披琅書於无崖，誦帝章於碧雲，理宿根於玉訣，檄威靈於瓊文，唱妙曲於空洞，精靜念於玉軒，理二儀於玄圖，掌帝錄於萬仙，總地司於五嶽，領上真於三關，上統无崖，下攝洞源，自天以下，莫不咸隸於太真。神非可測，化不可名，近難可論，遠不可尋，清難可滓，混難可澄，微乎妙哉，斯至德之帝靈，巍巍乎高尊也。

太霄琅書，乃九天王飛霄之曲，瓊文帝章，乃九天之上〔文〕#1。並以元始之初，生於自然空洞之中，虛皇玉帝受之於九玄。於是天王仍記名焉，鑄金為簡，刻玉結篇，金縷玉字，以明寶文。秘於九天之上，大有之宮，西華玉女、金晨玉童各三千人，侍衛典香。如是九帝上聖，一月日悉三登玉階，朝宴神真，運周萬劫，傳於太真王。其道高妙，眾經之宗，神挺奇秀，精冠九天，玉惠虛朗，洞趣入玄，自非上真之士，不得參聞，皆授已成真人，不傳於中仙也。

。太霄琅書，乃九天王飛霄之曲，瓊文帝章，乃高靈玄暎之道，九天之精，洞監於萬炁，總統於眾經。凡修《大洞三十九章》，徊風混合帝一之道，《唯一玉檢五老寶經》，解釋宿根，拔度七玄，而无此文，則九天王不納其音，九炁錯綜，神真不歡，天魔侵景，萬試來干，思不徹微，天不啟關。凡修眾經，以瓊文為先，誦詠寂室，靜慶霞庭，通暢九霄，整結上玄，令玉宮駭聽，萬真臨軒，羣魔伏袂，萬試敢前，隨意所修，乃得道真，萬遍道備，騰身太清。要訣不煩，正在此經，精心苦行，剋上仙也。

雲務子不修他道，受虛皇道君《太霄琅書瓊文帝章》，於九霄之上，歌詠妙篇，遊娛適肆，感暢神真，致三元下教一位登太真王。以傳太華真人、三天長生君、太和真人、東華老子、南極總司禁君、西臺中侯、北帝中真、九靈王子、太靈真妃、赤精玉童、玄谷先生、南嶽赤松、中山王喬、紫陽真人、西城王君、中皇先生、趙伯玄、山仲宗等。一十八人，並修此道，面發金容，項負圓光，乘空登霄，遊宴紫庭，變化萬方，適意翱翔，嘯命立到，徵召萬靈，攝制羣魔，決斷死生，駕霄乘煙，出入帝庭，皆由瓊文，以致上真。王君今封一通於西城山中，宿有金名帝簡，綠字紫清，合真之人，當得此文。得者寶祕，勿妄輕傳，洩露靈篇，九祖被考，充責鬼官，長閉地獄，萬劫不原。

九天元始號

上第一天名鬱單无量天，天上又別置三天之號。九天丈人治於无量天，去第二天二十四萬里。其天上人壽九百萬歲，如世間五百歲。天有四玉帝君，常以月一日、三日、九日，遣玉晨使者履行天下一有修學上道，佩太霄琅書，檢慎法戒，名書帝籙，得同无量天人之壽。有犯科違律，為四司所糾，考屬左右三官。至此日當清齋，平旦入室，誦无量天太霄琅書瓊文一遍，則玉晨使者奏子於天王，記名於青宮，九年得乘太霄瓊輪，上昇无量之天。

第二天名上上禪善无量壽天，天上又別置三天之號，悉隸於无量壽天。九天真王治於无量壽天，去第三天四千六百萬里。其天人壽三千六百萬歲，如世間人壽一千歲。天中有四天帝王，常以月七日、十日、十一日，遣領真侍仙履行天下。有精修上道，佩太霄琅書，齋戒誦經，不犯於科，名書帝簡，紫字上清者，得同无量壽天人之壽。有犯科違禁，四司所糾，考屬左右三官。至此日當清齋，平旦入室，誦无量壽天太霄琅書瓊文一遍，則侍仙奏子於天王，記名於青宮，九年得乘太霄飛輪，上昇无量壽天。

第三天名梵監天，一名須延天，天上又別置三天之號，隸於梵監天。元始天王治於梵監天，去第四天六百七十二萬里。其天人壽一億五千二百萬歲，（如）世間二千歲。天中有四帝真王，常以月二日、四日、十三日，遣主仙玉郎履行天下。有精修上道，佩太霄琅書，齋戒誦經，不犯於科，名書帝籙者

，得同梵監天人之壽。有犯科違禁，四司所糾，考屬左右三官。至此日清齋，平旦入室，誦梵監天太霄琅書瓊文一遍，則主仙玉郎奏子於天王，記名於青宮，九年得乘太霄飛輪，上昇梵監天。

第四天名兜術天，一名寂然天，天上又別置三天之號，皆隸於兜術天。元始天王所治兜術天，去第五天千二百四十萬里。其天人壽六億八百萬歲，如世間四千歲。天中有四天元王，常以月五日、十二日、十六日，遣定仙玉真下履行天下。有精修上道，佩太霄琅書，齋戒誦經，不犯天禁，名書帝圖者，得同兜術天人之壽。有違科犯禁，四司所糾，考屬左右三官。至此日當清齋，平旦入室，誦兜術天太霄琅書瓊文一遍，則玉真奏子於元王，記名於東華，九年得乘太霄瓊輪，上昇兜術天。

第五天名不驕樂天，一名波羅尼密天，天上又別置三天之號，皆隸於不驕樂天。高上元皇所治不驕樂天，去第六天三千六百八十萬里。其天人壽二十三億四千萬歲，如世間八千歲。天中有四天統真王，常以月十四日、十七日、十九日，遣中真使者履行天下。有精修上道，佩太霄琅書，齋戒誦經，不犯科禁，名書帝圖者，得同不驕樂天人之壽。有犯科違禁，四司所糾，考屬左右三官。至此日當清齋入室，誦不驕樂天太霄琅書瓊文一遍，則中真使者奏子於四天王，記名於東華宮，九年得乘太霄瓊輪，上昇不驕樂天。

第六天名化應聲天，一名他化自在天，天上又別置三天之號，皆隸於化應聲天。虛皇玉帝所治應聲天，去第七天五千三百八十四萬里。天人壽九十二萬億一千六百萬歲，如世間六千歲。天中有天寶帝王，常以月十八日、二十日、二十三日，遣萬石使者履行天下。有精勤好尚，佩太霄琅書，齋戒誦經，不犯科禁，名書帝圖者，得同化應聲天人之壽。有犯科違禁，四司所糾，考屬左右三官。至其日當清齋入室，誦化應聲天太霄琅書瓊文一遍，則萬石使者奏子於天寶帝王，記名於東華宮，九年得乘太霄瓊輪，上昇化應聲天。

第七天名梵寶天，一名波羅尼邪拔致天，天〔上〕#3 又別置三天之號，皆隸於梵寶天。萬始先生所治梵寶天，去第八天五百二十萬里。其天人壽一#4劫，如世間五千年。天中有四天高上帝王，常以月二十一日、二十四日、二十七日，遣監真使者履行天下。有精心苦行，勤修上道，齋戒誦經，不犯天科，名書帝簡者，得同梵寶天人之壽。有犯科違禁，四司所糾，考屬左右三官。至其日當清齋入室，誦梵寶天太霄琅書瓊文一遍，則監真使者奏子於高上帝王，記名於東華宮，九年得乘太霄瓊輪，上昇梵寶天。

第八天名梵摩迦夷天，一名梵眾天，天上又別置三天之號，皆隸於梵眾天。紫虛帝君所治梵摩迦夷天，去第九天六百八十萬里。其天人壽二劫，如世間千五百歲。天中有四大明真王，常以月二十六日、二十八日、二十九日，遣羽

仙使者履行天下。有精心苦行，修齋誦經，不犯科禁，名叅青宮，得同梵摩迦夷天人之壽。有行惡犯科騙違戒，為四司所糾，考屬左右三官。至其日當清齋入室，誦梵摩迦夷天太霄琅書瓊文一遍，則羽仙使者奏子於大明真王，列名於東華宮，九年得乘太霄瓊輪，上昇梵摩迦夷天。

第九天名波梨答愆天，一名大梵天，去下五百億二十萬里。其天別置三天之號，皆隸於大梵天也。太真王治於波梨答愆天。其天人壽四劫，如世間二千五百年。天中有五帝王，常以月一日、十五日、三十日，遣領仙使者履行天下。有修齋戒，整束法服，誦經精思，不犯天科，名書帝錄者，得同波梨答愆天人之壽。有行惡犯科，為四司所糾，考屬左右三官。至其日當清齋入室，誦波梨答愆天太霄琅書瓊文一遍，則領仙使者奏子於五帝，記名於東華宮，九年得乘太霄瓊輪，上昇波梨答愆天。

此九天是始炁之精，眾真帝皇所治。其天別置三天。三天者，皆是九天之別號，合三十六天也。宮室官司，悉有次第。其外有諸梵天，名皆以九天支幹，悉係屬於九天王也。九天又各有一天王，非帝王之號，皆處九天之上。修行上道，求仙度世，宜知天王諱字。知者九天列名，玄以紫炁覆廕其身，神兵衛己，令得九天秘書，壽同九天之數。得者寶密，妄宣三人，死入九幽地獄考掠，萬劫不原，慎之。

第一鬱單無量天王，姓混諱，衣九色无縫自然斑文之裘，頭戴耀精日圓，怡天无映玄臺紫戶之內，左右侍真玉女九萬人。

第二上上禪善无量壽天王，姓楔諱，衣九色自成雲文之裘，頭戴暉精月光，治天玉國珠林七寶瓊臺，左右侍真玉女七萬人。

第三須延天王、姓滓諱，衣九色三法雲文之裘，頭戴天元寶明，治天玉京靈都宮，左右侍真玉女九萬人。

第四寂然天王，姓浮諱，衣七色龍文通光之裘，頭戴陰精夜光，治天珠宮瓊臺之上，左右侍真玉女六萬人。

第五不驕樂天王，姓凝諱覆，衣九色飛霜雲文斑裘，頭戴青華歲星玄精，治天無映丹房九層玉臺，左右侍真玉女七萬人。

第六化應聲天王，姓輝諱，衣九色流光耀雲錦裘，頭戴白光太白玉精，治天瓊林上宮朱映之房，左右侍真玉女六萬人。

第七梵寶天王，姓精諱霧雲，衣九色流雲飛晨之裘，頭戴流丹絳寶熒星玄精，治天南上七映之宮，左右侍真玉女八萬人。

第八梵摩迦夷天王，姓玄諱霽，衣九色无縫飛雲之裘，頭戴玄晨辰星流精，治天九玄鳳城紫瓊玉臺，左右侍真玉女五萬人。

第九波梨答愆天王，姓王諱靈，衣九色无縫玄雲寶裘，頭戴无極流黃鎮星

飛精，治天陵層玉京大有妙宮九曲之房，左右侍真玉女九萬人。

九天九王，萬炁之本宗，眾帝之先祖，乃九炁之精源。以天地未凝，三景未明，結自然而生於空洞之內，溟滓之中，歷九萬劫而分炁各治，置立九天，日月星辰於是而明，萬炁流演，結成道真。元始上皇、高上玉虛，並生始天之中，三十九帝、二十四真，遂有宮闕次序之官。上皇寶經，皆結自然之章以行。長生之道，不死之方，符章玉訣，皆起於九天之王，傳於世代之真。至三五改運，九靈應期，後聖九玄道君，推校本元，以歷九萬億九千累劫，上皇典格，多不相參。道君以中皇元年九月一日，於玉天瓊房金闕上宮，命東華青宮尋俯仰之格，錄校古文，改定撰集靈篇，集為寶經三百卷，以付上相青童君，使傳後學玉名合真之人。凡學求仙，不知道之所出，寶訣所生，投闥而學，无有祖宗，真不為降，道亦不行。諸欲求仙，當尋九天之根，得其本元，道无不備，仙无不成也。但九天王祕諱，藏於九天之上大有之宮，不傳於下世。有玄名帝圖，金字上清，推運遇會，得知九天王名，天王即遣玉童十二人、玉女九人，侍衛兆身。依科清齋九十日，或九日，齋上金九兩，紫紋九十尺，以誓九天之信，師然後而盟傳。不〔得〕#5輕泄至靈，考延七祖，長充鬼役，負石運山，身沒三官，萬不得仙。

鬱單无量天王太霄琅書瓊文第一

太霄空洞炁，結炁成雲營。我王挺神匠，有化若無形。無形中有真，有真無中生。眇莽玄虛上，蕭蕭元始精。法景朗妙覺，玄運來相征。列宿羅玉宇，飛霞超綠瓊。煙落三晨曜，流光鬱紫清。携拎玉景臺，解憩戲鳳城。迴霄登九嶺，以啟不窮齡。誰能同此遊，可來尋余名。余名甚易知，安在東華庭。自可朝玄都，精微思帝靈。棄去雲外念，專一守黃寧。披誦太霄章，三關自當明。玄降徘徊輦，虛遣飛霞駟。九天雖之遐，妙想安爾形。

上上禪善无量毒天王太霄琅書瓊文第二

靈運啟空洞，金真秀瓊胎。法景太寂庭，玄化自相推。歷劫淪九冥，與真契幽期。三晨告元始，運通自來綏。匡轡明霞上，流精耀玉枝。顧盼無中有，混合似嬰兒。父寧與母精，逍遙戲鳳臺。落景遊雲房，獨妙誰能知。合慶離羅門，解襖紫霄崖。若欲相尋索，精研琅書辭。迴轉瓊文章，天王自當之。洞存帝一尊，以為求仙基。絕念棄外想，常使心神夷。積感致真降，鬱然煥羽儀。拔度七祖根，咸同登雲階。玉章映高靈，瓊文難尋思。二妙以相和，各稱本不齊。子欲戲九玄，但誦太霄詩。萬劫在俄頃，勿憂天應遲。

梵監天王太霄琅書瓊文第三

澄清无毫穢，結炁成紫暉。丹霄暎監天，羅布迺南迴。三晨明列宿，七轉朗太微。靈風迅奇香，玉籟聲何悲。神鳳翔瓊林，羣仙振羽衣。天玉乘運征

，握節總萬機。虛輪擲空洞，遼朗九天扉。携提霄中寶，解衿入瓊幃。敷爛扶晨炁，耀羅煥玉階。陵梵暎朱日，千景翼靈輝。飄飄元化內，玉輦正徘徊。公子命虎符，總攝萬神歸。拔滅七祖根，窮魂皆仙飛。琅書慶雲庭，瓊文洞虛微。精研道日鮮，億劫靈不衰。萬化隨運遷，乃知妙音希。

寂然天王太霄琅書瓊文第四

宴景太寂鄉，迴風迅瓊輪。丹霄翼綠輿，神公輔帝尊。翳翳九玄化，離離開趣門。徘徊金羅上，嘯歌慶靈雲。三唱朗玄覺，五迴道乃分。金房煥嵯峨，流精何紛紛。左顧見无英，右盼觀白元。履昌度黃籙，太一挺命根。為我記仙籍，授我度命文。清唱運天真，靜思理百關。帝一鎮靈宮，法服飛青裙。相與契何許，合會九天端。有日若无期，皇華正四圓。至感棄餘念，道從玄中傳。靈感各有運→ 至學故多全。

不驕樂天王太霄琅書瓊文第五

空中生紫煙，鬱勃翳華宮。流明順運迴，丹霄暎綠房。翼輔虛中景，耀靈煥十方。萬帝由真運，莫若九天王。體結自然秀，含炁挺虛宮。理化正四維，號為眾帝宗。落景乘八煙，總統輪空洞。朝遊西臺館，夕憩扶朵宮。攝扳玄國錄，拔度青華童。桃康定命籍，明初保劫功。流盼无崖際，萬化隨運通。飛步誦太霄，幽尋无始蹤。積思感至寂，以致登玄總。宿基流餘慶，七祖返南宮。五苦非所履，結友在太空。靈嶽非常宅，飛雲是我龍。結携九嶺真，偶景以成雙。何為坐囂穢，婆娑待命窮。

化應聲天王太霄琅書瓊文第六

高靈秀空洞，凝炁結朱煙。握節迴九霄，飄飄天帝真。瓊臺耀巖阿，紫風鬱玉麟。靈歌逸幽宮，蕭條雲上人。携契七暎房，金羅煥中田。天王正有九，飛仙有億千。洞陽鬱靈標，為兆度命年。丹華朗朱日，流芳觀兆身。仰歎月中漿，九源降液津。永保不終劫，內外洞虛鮮。積思感太空，動得无極淵。形與混合同，遊宴莫能旋。

梵寶天王太霄琅書瓊文第七

三晨朗幽夜，流霞耀金日。丹房煥嵯峨，靈香繞瓊室。公子合慶堂，履唱携帝一。三元混合宮，微言甚幽密。兆欲度命年，靜思勿雜匹。寂若雖雲无，真從空中逸。慶加靡不周，七玄自蒙拔。積福有重基，宿根咸消滅。瓊文有妙章，斯篇慎忘失。存念至靈諱，道降同玄一。

梵摩迦夷天王太霄琅書瓊文第八

九玄洞元炁，紫素凌玉霄。靈秀煥金門，神融茂瓊條。豁落紫虛館，慶雲隨化消。淵響叩靈機，法鼓振太幽。宴景玄晨關，流迴薄靈颺。匡轡九天外，運駕以逍遙。徘徊紫霞峰，容冶玉皇朝。萬劫不俄頃，儵欵二象交。虛庭无

稽逮，去來順運寥。大化不改度，三晨洞、靈標。琅書慶神室，瓊文理清謠。合秀自玄挺，反容非華翹。

波梨答憇天王太霄琅書瓊文第九

玄炁結九霄，紫虛朗太陽。飛瓊凌華芒，流精凝玉霜。天真乘運迴，薄雲茂玄梁。冥會自相感，丹霄暎輕行。幽期高晨府，携契朝玉京。靈化冲漠裏，寥寥冥運彰。流芬翳朱日，迴風迅奇香。煥爛金門上，瓊臺吐玉英。蘭芝盈玄谷，仰咽六位昌。神逸感寂宮，幽思徹洞鄉。執契太霄館，歸真瓊文章。

《太霄琅書瓊文帝章》，皆以九玄微辭，九天王於空洞之中，元始之先，玄歌理命，遊慶霄庭，音句虛微，玄中而生，神真實訣，故著靈篇。得行此道，位同九天，微思至諱，存神念真，靈瑞告感，自然登晨。

凡修此道，當以本命八節之曰，沐浴清齋，正中入室，東向叩齒九通，仰存九天之上，九色飛雲流光下暎，蒨藹室堂，微呼九天王諱，存念真神，便誦太霄琅書瓊文之章九篇一遍，以慶霄庭，神歡寂室，靈感九玄。如法九年，剋乘飛景，宴轡紫晨也。

若以九天遊宴下降，察行萬仙玄會之日，如上清齋，各以其時誦詠一遍，則九天記名，右別太真，九年无虧。剋得上仙。

帝章皆九天元精所生，九天帝王隱書寶名，符章玉訣悉表其中。有佩此文，九天同真，萬靈稽首，羣仙衛迎，威制天魔，出入无方，乘雲駕虛，遊宴太空。此文微妙，萬帝之宗，有明此訣，即為仙王。有泄輕傳，死役九泉，殃逮七祖，同填河源，萬劫之掠，宜慎奉行。

=====

=

=====

=

=====

=

右瓊文帝章二百四十音，皆九天之元精，萬真之名。當刻書棗心之木，受之於絕巖清泉之札，施於飛羅之巾，北向上誓九天，奉受九天之章。弟子執上金九兩，紫紋九十尺，向南而伏，師讀瓊文而授弟子也。若未得刻書印文，亦可以雌黃書青碧上，盟而授之，然後可徐徐更刻文，登山盟於九天也。

若刻書瓊文於棗心之上，不得懸印章向於四方，以玉函盛之於別室，正向

於上，朝夕燒香禮拜九天之王也。兆欲召東嶽仙官，問吉凶之兆，通靈致真之法，當以甲乙之日，以帝章向東讀之一過，則仙官立到，與真共言。召南嶽，當以丙丁之日，如上法，則南嶽仙官立到，與真通言。召西嶽，當以庚辛之日，如上法，則西嶽仙官立到，與真共言。召北嶽，當以壬癸之日，如上法，則北嶽仙官立到，與真通言。召中嶽，當以戊己之日，如上法，則中嶽仙官立到，與真通言。凡召五嶽之法，皆向正方，叩齒三十六通，便讀帝章也。精心齋戒，神无不降。若體履囂穢，未洞玄冥，便閉眼精思，无不見神。自當究幽察冥，知吉凶之兆，九年與真同形，出空入无，遊宴玉晨。兆修行道備，有真人下降，雲輿紫蓋來迎兆身。兆當以帝章之印，印兩蹠及兩手心，立成羽翮，運兆同昇也。若於五嶽隱靜之處，修行誦詠，有異物假託真形，降兆之房，當以帝章之印向之，則真偽立見。若是真人仙官，兆當稽首奉迎，隨意陳請，剋得要言。若以魔精，即復本形也。兆當叩齒三十六通，讀帝章一遍，魔即滅景絕形於兆前。如此之法，惟令心口相應，慎勿示人。示人泄真，其道不行。兆暮臥獨處，當以帝章置於心上，即有太霄真仙來衛，兆形景應夢想，與真共言，不出九年，得面對真人。凡受帝章之印，不得妄泄見人，見三人道去，施用不行。凡修此道，慎勿輕履淹穢，觸忤真神，犯之九天之考，掠兆之身。若有玄圖帝簡，綠字紫書，金骨玉髓，名書青宮，九天自當遣四極真人，下授兆身瓊文帝章也。若有宿緣，遭遇明師，皆玄挺運會，應得此文，剋成上仙。皆當實金繒之信，詣師清齋，奉受修行。无信盟，天不啟靈，真不降，萬不成仙。師傳謂以輕泄，考及七祖，長充鬼官，明慎玄科，慎勿妄宜。

凡傳《太霄琅書瓊文帝章》，當於高上空寂之間，施飛羅之巾於北面，香餅棗菓之物置之，盛以別盤，以經置於飛羅之上。師北向叩齒三十六通，奉上請九靈元真玄始上官，金仙玉女，太一靈神，監真直司，五帝眾真，今有某嶽先生王甲，紫絡結胞，宿命挺仙，齋金繒之情，求受靈文，九天真諱瓊文帝章，天科告慎，誓寶靈真，願迂神光，玄暎下臣，有泄之日，歸身河源，七祖謝罪，不敢又仙。畢，以經章手執付弟子也。訖，以餅菓埋於玄嶽之中，不得他用。此九天王之祕奧，太真之妙訣，修學之士而无此文，徒勞於空山，无感於寂庭。勤尚篤志，思念九玄，天王感悅，遣玉童玉女侍衛兆身，九年之內剋乘飛瓊，上昇九天。

洞真太上太霄琅書卷之一竟

#1『文』字原缺，據《高上太霄琅書瓊文帝章經》補。

#2『如』字原缺，據上下文補。

#3『上』字據上下文例補。

#4『一』字原誤作『七』，據《瓊文帝章經》改。

#5『得』字據《瓊文帝章經》補。

#6『輕』字原誤作『經』，據《瓊文帝章經》改正。

洞真太上太霄琅書卷二 缺

洞真太上太霄琅書卷之三

三乘要用

《高上太真玉帝四極明科》，上宮二十四條；

七條諸官有過退削進號之目，十七條黃赤三洞五嶽篇錄格制威儀。

下宮二十四條。

二十二條起左乙訖飛霄六十六卷目訣，二條有經受經法，遇得聖文法訣也

。

次太玄都左宮女青四極三十一卷獨立寶經明科，律文二十四條；

三十九章訖靈飛六甲五十六卷目訣。

右宮二十四條；

三條三科目訣，六條洞玄三皇五嶽威神策高仙符金液經方品格目訣，十五條法服誦經齊戒威儀也。

中宮二十四條。

七條於世供養奉師投禮訣，九條出入存念禁解忌穢臥息便曲救月蝕訣，八條受經對齋治寫傳授信物三分不得遊遨。

次太上九真明科三品律，上品九條；

起傳大洞真經訖六甲八條，一條傳方丈諸符訣。

中品九條；

誠罪篇目。

下品九條。

贖罪條目。

三科難尋，按此要用也。

凡三乘所用，大同小異，心業所果，大異小同。自非通玄，並未能辯，即急所行，三科為要。要用之法，精自揣量，己所不堪，慎勿強冒，他所未任，亦莫苦勸，勸苦有相咎之灾，冒強致黜退之考。精心鍊身，以善改惡，自試試人，歷依妙訣，居止冠衣，供養啟告，叅受施行，傳授取與，唯令恰恰，不負幽明人鬼，无負心身所能，不怠於己，不累於人，不違師友，不辱道真，不畏讒嫉，不愧親疏，不疑遠近，不惑尊卑，不慙信誓，不謝古賢，賢聖必齋，魔邪降伏，三乘之人，小有優劣耳。

四極明科旨訣第二

四極科序云：夫有金名，得受四極，依科條奉，四界司迎，當絕陰陽，勿

與俗交，生死之穢，觸忤真靈，啖食五葷，炁衝胃府，損精喪神，裸身三光，輕慢玉晨，自收其咎，禍滅兆身。不得妄與常學談說經文，評論玄古，意通至真，宣傳非所，泄露道源，妄示世人，殃及七祖。

八節、本命，清齋燒香，悔過帝君，拔罪九陰，解散七玄。立春、春分，燃九燈中庭；立夏、夏至，燃三燈；立秋、秋分，燃七燈；立冬、冬至，燃五燈，本命十二燈。夜半出燈下向王，本命向太歲，叩齒二十四通，微呪曰：

高上太真，萬聖帝皇，五帝玉司，總仙監真，今日吉良，八節本命，開陳陽罪陰考，絕滅九陰，至於今始，拔擢七玄，免脫火鄉，永離刀山，三塗五苦，不累我身，得同天地，長保帝晨，五願八會，靡不如言。畢，解巾叩頭百二十，額向地而已，勿令痛。竟，復巾，仰天心念：我身今日上享天恩賜，反形骸受生飛仙。畢，叩咽二十四炁止。如此三年，宿愆並除，身與真同，不履五苦，脫過火鄉，克得真人遊宴兆房。

上宮科云：凡受上清，不得增損天文，破壞道經，貼拭字體，虧忽靈文。三犯廢功斷事十年，更清齋首謝，然後得還修行；五犯左官所執，七祖、己身並充刀山。受經寫一通，凡下供養，別室安狀，牀高五尺五寸，以法天地之數，廣長四尺九寸，以應四時之名。故經有四時之號。朝夕燒香，禮拜經前，以祈神明。不得使雜俗之徒，染穢履殮，入室觸禁。受經清齋，別室燒香，不交人事，淨染紙筆。東向起經，起經之時，不得口詠章文。皆當比字三校，不依古典，脫失言句，皆滅筭十紀。失行考屬右官，見世風刀，求死莫度。不得宣泄太一帝君之名，以語非學之人。北向後同。

下宮科云：凡有上經，皆骨相合仙，當棄家放妻，遊於五嶽，長齋山林，精思苦念，正中而飡，素水簞瓢，不勞苦寒，晨夕无怠，乃感帝皇玉司右別，三元詣房，三年策駕，上昇太清。若有輕慢，穢忽靈文，宣傳泄露，使世見聞，違盟負誓，殃及七玄、己身，刀山食火啖炭，役負蒙山之石，以填積夜之河。受上清寶經，或因緣遇會，未能棄家入山，故在世間，心崇意敬，志向玄靈，盛起一通，別室供養，朝夕燒香，出入禮拜，如奉君父，有事啟乞，无不從心，天遣玉童玉女，侍衛此經，察子之心。歸情宗奉，神自感真，隨願所欲，禳灾卻患，萬魔伏滅，千精喪形，富貴吉昌，官位興隆，求道得道，求官得官，子孫熾盛，金寶如林，七年如法，當有真人降子之房，與神交接，授子要言，不學自成，不勞而仙。故上士學道，處於三運者也。若遇而不受，亦其運也，受而不信，將其命也，信而不寶，真其罪也。三者既備，考延七玄，己身被苦，左右二官罰以風刀，三塗五苦，九厄八難，萬劫得生不人之道。

獨立明科旨訣第三

右宮科曰：高上太真玉皇帝君、玉清真人、萬仙眾聖、得道靈人，皆佩太

真明科。凡學之士受九真明科，太上大道君受四極明科，即是四明高聖玉訣。

脩上清道經，入室之日，鹿皮帔巾，亦葛巾，紫表青裏，帔廣四尺九寸，長五尺五寸，表二十四條，裏十五條，領帶同紫，亦可玄冠，女子太洞，皆元君夫人，紫紗褐，用二丈四尺，兩半三十六條，身二十三條；青紗裙，四十五尺，八幅，幅四尺九寸，合三十二條，餘作裙襴。男女並存玉童玉女，各十二人，典掌法服。其入室時，於戶外叩齒三通，閉眼，存室內紫雲之氣鬱來冠身，玉童侍左，玉女侍右，金光寶芝，洞明內外，呪曰：

天朗炁清，三光洞明，金房曲室，五芝寶生，玄雲紫蓋，來映我形，玉童玉女，為我致靈，九帝齊景，三元同駟，得乘飛蓋，昇入紫庭。畢，引炁三十九咽，後入室禮拜行事。誦黃庭別有訣。

入室誦經，五帝束帶，四司陪位，不得臨經住音，與外人交言，越略一句，更卻百言，至五句卻五百言，始就誦失一句，便誦一篇。當目注經文，心念神真，不得他念，以亂天音。千言以下，不得進飲，千言以上，至五千言，得一進飲，至萬言二進，萬言以上三進，不得妄進飲食。萬言疲極，得住消息，後讀竟篇，不得經宿。男女同學，亦得同室，異牀向北，男東女西，不得坐起臥息混同一席。先施金真制魔之符，然後誦經三十九章。坐方丈，掃灑內外，每令精淨，燒香明燈，斷絕外因，供養之具，几案巾裏，不得借人。

中宮科云：有玉名青宮，受三十一卷，未能遣累絕志幽山，拘逼世務，或山資未備，亦得於世供養，朝夕禮拜，如奉君父。有夫妻之對，亦得修七經之道，上真帝景、夫人元君之胤，皆得下降。有道之人，結對景之緣，以炁相適，亦歷運所以。供養師宗，如奉神明，入室燒香，先存師所在，心拜師前，然後行事。不得綺言妄語，欺詐同學，

誘取經書，毀謗師君，造作无端，露泄寶訣，以與不盟。

凡有金名，得受寶經，依科盟傳，審有其人。傳付之後，弟子負違，罪及師身。男女同學，共奉師宗，入室齋戒，當隨所學深淺次第，同德以先後次之，復同以長幼次之，上德高才為大法師。不得互爭，不相推敬。同奉盟師，心意和美，炁響相參，體行同一，舉止齊并，每令彼此同得道真，俱受師道，白日昇天。不得更相攻伐，鬪亂同根，口舌誼譁，讒訕无端，師盟既同，形色不歡，始能稱己，諍競取仙，遂成咎敵，如之冤家，為四司所糾，不得又仙。

凡受上清，八節之日，送金鑲一雙，青繒九尺，以奉於師。師得此信，連條弟子某州郡縣鄉里姓名年月，於九尺青繒上正中，於玄嶽絕嶽之側，北向奏名青宮，叩齒二十四通，微呪曰：

天迴炁射，八道運精，三五應期，九祚代傾，本真玄寂，輔臣帝靈，玉札已御，今奏青名，謹辭九府，五嶽司靈，記我所列，上聞玉清，三年之後，來

迎某形，賜乘八景，昇上帝庭。

畢，埋青繒於絕巖之下，如此三年，克有真降。受科不奏此名，則青宮无錄，四司所糾，同竊盜之罪。若師先化，或相去遙遠，不得輸送鑲物，自得施行，但鑲送於師，一節不送，不得又仙。

凡修上道，夷心寂意，靜默守真，出入存念，唯道為身，清齋執科，計日成仙。不得忿怒憤激，結炁煩冤，罵詈呪詛，引喚鬼神，上觸天科，收延考官。當念十天蜺飛蠹動，已生未生，咸得道真，成就不先，願天普隆，功滿德就，計日成仙。不得心懷伐逆，手害有生，嫉人勝己，願人危顛，觸行无善，唯惡為先，此禁尤重，考結右官。當念五藏六府肅清，內夷外丹，上下齊精，寶華結絡，神秀鮮明，不得飲酒大醉，溢盈翻倒，藏府五神飛驚，願念不固，所造不成，內虛熱攻，計日腐零。如此之學，徒勞心情。常當沐浴，盥洗為急，屐履衣服，不使污穢，真靈遠離，凶邪所乘。不得妄入穢苑，哭泣悲淚，吊問死喪，出入三光，冥眸臥息，不得露結脫衣裸形，毀慢身神，恥辱真文，真靈遠逝，空尸獨在。不得妄與陰家共妹坐起，外炁不同之人共著衣服，及同被臥息，屐履之屬，更相交關。不得北向本命之上，二處便曲，觸忤玉晨，穢慢本真。行皇華之道，月蝕朔會之日，皆天炁攻伐，二象交兵，按紫書之訣，衛而救之。

不行此法，不得修日月之法。

凡受上經，皆先對齋，啟盟而傳。若未得啟盟，當告齋起經，起經竟，便盟而度之。不盟而付，師與得者同被左右二官所考，禁限甚重。末世求道者寡，三天促運，須賢輔正。若有骨分，得受此經，依太上三天正一之法。受經未周七年，青簿玉名玄格未定，不得便為師。太上常別遣三官司隸，四部校尉，周行天下，有犯得經而泄之人，即下女青，收其七祖，付火鄉鑊湯，一掠焦魂，乃履刀山萬劫，還克負石之責，己身及輕受之人，并充風刀見世之考，求死不得，掠竟乃充刀山火鄉，二十四獄，三塗五苦萬劫，還負石之役。

年限未周，遇有玉藏合仙之人，求請是經，當度於先智法身，不得以己未傳，塞於求者之路。若勸度三人合真，其功感天，玉帝右別，告下四司，削其罪名。受經備信，信以誓心，准於豁髮歃血之誓。无信而受經，謂之越天道，无盟而傳經，謂之泄天寶。傳受之人，各慎其負。受弟子信，二分散之，一救山栖，以卹窮乏，一供己法服，一為弟子七祖立功，市香膏之屬。賚信詣師，未充科限，受後年數應傳，不得取信入己，當送仙師備充前限，然後乃得三分散之。受信不散，積聚營他，窮乏之士无極救之惠，七玄父母无拔罪之功，己身無有帝王之服，虧神越法，三犯不得又仙。

佩符帶科，齊靜為務，不得遊遨集止凡處，數與常俗交關口舌，爭計意氣

，更相忿恨，指引天地，觸神犯禁。八節、太歲、本命之日，服上真靈符十五首，以解宿口結過，消滅風刀水火之考，超出八難，九年降真。未備大經，亦得單御此符，別受盟信，上金二兩，紫文四十尺，告齋而傳。受符各以其日，入室燒香曰：東向叩齒二十四通，呪

高靈玉真，上聖九玄，玉文固魄，保形鎮神、三鍊九試，我道自然，超度艷都，永離刀山，三塗五苦，不拘我身，上告玉司，注我名真，青籙紫簡，得道之篇，三元齊景，九帝同軒，得策紫雲，上造斗辰，福流七祖，同獲上仙。畢，服符咽液二十四過，如法三年，禍根既散，克自神仙。

凡受上清，不見明科，萬无成也。兆欲為學，明科為先，見科而學，不勞而成。盛掃香火，恭奉神明，有犯輒悔，明燈中庭，吞咽真符，消罪保形，玉帝感徹，右別兆情，玉司无有結罪之目，玄都无有扎罰之名，天給童子，侍奉兆身，太微冠帶於七祖，南宮反形於更仙，上真妙道，勤而奉行。

凡有四極明科之身，四司五帝列兆之名，上言青宮，高聖太帝以上靈玉童三十六人，西華玉女二十四人，奉衛兆身，禳灾卻禍、消罪除患，紓過賞功，通神致真。兆當燒香，朝夕禮拜，一月三誦科文，令常搜備，不得輕忽穢慢靈文，妄向三人道說靈文，身死形殘，七祖充刀山火運之周。寶經應行七百年中，遇有其人，而傳之。受科交賚五色錦繒各九十尺，鳳文之羅四十尺，金龍、玉魚各一枚，玉札長一尺二寸。記文如左：

某號年太歲某月朔某日時，某州郡縣鄉里，男女官道士某嶽先生姓名，年如干歲，某月日時生，命屬某嶽某帝君，謹於玄嶽高山之巖，或某處館舍，告誓九天，上受四極明科，奉行道真，乞注紫簡，言名青宮。違盟負誓，不敢希仙。

師北向，叩齒二十四通，上啟高靈玄虛九天大王、明皇玉帝、三十九真、上聖高玄、萬仙道君、監靈使者、侍仙玉郎、四司五帝、領真監仙。今有上學道士某嶽先生，男女姓名，修承大法，奉受寶經，凡如干卷。沉在末俗，未能騰身，抗志玄虛，遊宴靈嶽，與世不別，未見明科，或見科忽略，習用負越，上犯天靈。今依盟賚信，投情委命，求受更請寶訣，凡如干卷，并四極明科。當如明文，誓身九天，約當檢慎，閉口奉修，存神念真，以期神仙。按如年限，遇有真文，當關九天，然後而傳，不敢輕泄，妄以示人。上告萬靈，下告五嶽三河九源，咸使知聞。違盟口信，七祖、父母，及某之身，長充左右二官考，履刀山食火二十四獄，三塗五苦，萬劫敢恨。惟乞啟付，降授真靈，以玉童玉女侍衛身形，早得昇度，飛行上清，諸所禁戒，皆如盟文。

啟畢，師左手執經科，弟子右手執信，對向天而微言曰：

上聖高玄，萬帝虛微，下世有願，守固不移，敢告明科，以檢眾非，玉

經寶訣，皆如科威，度身之此，萬炁總歸，長保天地，三景齊暉，敢有泄漏，長謝四非。

畢，弟子置信於前，受經，北向九拜而去。此盟亦總度眾經，眾經雖各有盟，四極總統也。

凡无玉札，用槿木淨者，度事訖，讀札，埋於絕巖之下。若館會堂壇，可送簡山中。青宮格，受經无信，埋札告於萬靈，亦不感徹，備信札，不可不投。

九真明科旨訣第四

中品戒罪篇

第一、諸是後學，七祖以下有殺害人命、劫賊攻掠，謀圖姦淫，莫逆之過，九族交通，謀反无道。若志尚自勵，首寫七玄重罪，施散功德，拔出幽魂，披露#1己身於三光之下，散髻叩頭，三年不倦，自責重信，投之九江，贖解前咎。

第二，己身先有重罪，手殺人命，及酷虐下賤，殺害眾生，劫掠百姓，謀圖姦充，九族相交，如妬賢能，伐逆師主。若苦志吐首，效功施德，披靈三光，散髮叩頭，三年陳謝，罰信投河，以贖己愆。

第三，凡是學者，受三奇寶文，上清祕經，而輕泄目錄，以示不同，宣露妙祕，輕慢寶章。一犯至十，罰功斷罪三年，然後得更清齋修行。過此以上，皆罪結九陰也。

第四，凡受上清，不得哭泣，臨見死尸及血穢之殮。一犯至十，罰功斷事一年，然後得依科自罰，拔罪太陰，更清齋行事。二十四犯，失經身喪。

第五，凡受上清，不得舉近婦人，行陰陽之事，混染真炁。十犯至二十四過，罰功斷事三百日，然後更清齋修行，過此亡身。

第六，凡受上清，不得心懷賊害，手行虐暴，殺生行凶，貪略姦宄#2，如賢妬能，攻毀同炁，伐敗經師。一犯至五，聽罰信謝責，斷事十年，得清齋修行所受。過此至二十四，身亡。

第七，凡受上清，不得北向便曲，及食五辛六畜之肉，飲酒作性，虧道慢法，疑二不專。十犯至二十四，聽依科罰信，謝過太陰，斷功一年，然後聽清齋修行所受。過此身亡。

第八，凡受上清，當依科責信，詣師告齋，然後受經。不得不告盟而妄披寶文，凡諸常人，不得輕略竊寫，及改易聖文，以意通訣，毀名古音，自作一法。一犯至三，斷功三年，按科自罰，投信九河，更清齋三十日，然後得還修行。過此至二十四、身沒鬼官。

第九，凡受上清，當別室安高座，高四尺四寸，廣五尺，請太上之經，明燈燒香，朝夕禮願，常為供養。不可使異炁之人，冒穢履穢，及婦人參入室內，觸忤神真，衣服屐履交關非類，臥息坐起，皆當與物有異。犯者從一至二十四，罰功斷事一年，然後更清齋修行。過此身亡。

下品贖罪篇

第一，犯中品第一罪，自責年竟，賚金環九雙，一兩金人一形，投三河。

第二，賚真珠一斤，書刀一口，一兩金人一形，投三河。

第三，金人一形，真珠一斤，書刀一口，沉之。

第四，中庭夜半燃三十二燈。

第五，香湯沐浴於庭，然二十四燈。

第六，私寶散乞貧民，作百人食以飴飢乏。

第七，上香十斤，送同學之人十處。

第八，清油一斛，於中庭然燈，多少適意，唯令油盡。又上香十斤，奉有經之師。

第九，然七燈於堂前。

九真篇曰：凡受上法，而不承明科，虧略天禁，罪累七祖，考逮一身。既知改首，罰責自厲，還修所受，而迴又犯，其考倍先。此則骨命不合，形與真反，魂與鬼伍，皆不得重首，復修於真經也。今五品明科，悟於未悟，既知而犯，將何要哉。奉者慎之。

凡能受法，皆願遵科，科條既眾，年月積少，短生修之，懼不能遍，顧景屏營，良可哀愍。大慈垂教，許有裁量，自計所堪，明順正典，典不可違，量不可謬，斟酌得所，有感必通矣。凡此九事，有重有輕，包羅先後，幽顯无遺，但一一行之，歷歲方竟，恐立功未周，而罪對奄至，欲併修促日，復慮建德淺微，而乖科增考。今取其元，宜可共用三年，三年之中，備行九事，精誠之至，必獲感通。三年无成，非中人以上，不足與語上，不足語上，行之徒勞耳。不徒勞者，成上真人功德，三年有成。有成斯外，大罪皆釋，期內小過，亦悉洗除，密而行之，精謹勿慢，閉口元言，驗可待矣。

第一，建齋及解投環之時，皆用三元之日為勝。

第二，建解投環之時，本命之日為佳。不知年者，太歲甲子可也。

第三，建解投珠之時，六甲陰日為善，甲子之陰在癸酉，他效此。

第四，建解皆用王相日時也。

第五，建解取月在束井日，始終得一便好。

第六，建解用三會之日。

第七，建解用二十四炁之日。

第八，建解用八節之日。

第九，建解用成日。

若千日之齋，其間行諸法，无有建解，當計取所行之日，依此上日，餘日不可妄用，魔好試難，明加慎之。

凡建三年之齋，或以千日為限，先屏他事，計資衣食法物之具，同心之人，皆令素定，不得齋中營求，脫有公私，吉凶驚異，破壞齋體。即啟解之後，更精結首謝罪愆，障礙致闌，慙愧悚惕。小犯可謝，懺悔而已，大犯不得過三犯，三解後，不得復建。嚴慎唯謹，不可妄與他論，凶人惡鬼嫉妬，破人堅正，卻邪事則濟矣。

凡露燈遇風雨，皆重為之，三過不佳，罪深灾重，彌加首悔，至誠洗心，限

得九過，須知乃停。他效此。

凡齋皆用三元謝文，隨宜增損，歷言九事，次第勿繁，解一事後，後不須言。九事之外，不須有語，九事之中，知與不知，犯與不犯，諦自思之。知犯的謝，慙技即洗，不知慢陳，亦自被原，不犯而謝，亦无慙也。至遠而尋之，无始中來，先世今世，前身今身，莫不犯此九科，謝而解之，必不重犯，尅日得道，了然无疑。患知之而不為，為之而不精，精之而不久，久之必登聖真，仙之高者也。

洞真太上太霄琅書卷之三

#1『露』字原誤作『靈』，據《太上九真明科》改。

#2『奸宄』，原本誤作『奸究』，據上下文改正。

洞真太上太霄琅書卷之四

智慧要科

思道訣第五

凡有玄名，青籙白簡，皆自思道，願奉願崇，願學願得，不忘須臾。嗜欲榮華，音妓財色，無之不干，有之不滯，能捨以歸道，及化以玄真，思道守一，不入二門，此智慧之人，皆可以習聖，始終無異，永正無邪，克得神仙，與道寶合矣。

念經訣第六

道本無形，應感生象，大象無象，象妙難明，故見真文，結空成字，戒以吉凶，聖真傳寫，演說施行。念之樂受，受之念行，行之必勤，勤之必久，請問諮疑，解紛釋滯，首末曉明，不負師旨，無妄穿鑿，無敢損增，不生誹毀，不議竊求，從師所受，多少隨緣，不敢泄慢，不敢越階。越是因果，因依師果，後宜遍學，以度羣生，精記題目，次序分明。一師未足，十師百師，千師

萬師，備足乃已。不備為中小之士，備者為大士，大士大宗，濟度無量，研尋至道，洞智慧源，始終無違，身足救物，克得神仙，與經寶合矣。

存師訣第七

天地布炁，父母生身，師君教化，率入至真，煉凡成聖，罰偽賞真，真仙登聖，非師不成。心不可師，師心必敗，自非上聖，不得師心，師心之聖，尚不顯言，猶悉和光，更相師友。凡夫無師，永無所成，成道由師，師不可忘，存之在心，炁炁相續，念念不絕，與經道同。道寶、經寶、師寶，號曰三尊，有一不備，無路昇真。存聖存師，貴師愛資，號大智慧，始終無虧，克得入玄，與師寶合矣。

凡三合三寶，智慧之源，源因無絕，攝統眾流，流漂忘歸，緣感發悟，各執志，急務還期，期還建業，勇猛專心，反流至源，號曰上聖。能學聖者，先定三生，生心入真，誓不懈怠，生口習誦，解了眾疑，生身束恭，非法不服，服以明德，解以救迷，真證無雜，累亂頓祛，祛累保樂，永劫長存，生無復死，故曰三生。三生之事，互有前後，行道存神，先整法服，思真習道，先當正心，次慎於口，然後檢身，身口相應，心又符同，三合成德，德著於服，脫著有時，與俗分別，內外具瞻，動靜所鑒，以之明德，不可致虧。故初建學業，心憑三尊，口請妙經，身擬法服，法服之制，品級各殊，昇降之科，大略于左。

法服訣第八

葛巾、葛單衣、布褐、布裙、葛帔、竹手板、草履。

右男子受經，須此法服。法服者，法則玄數，服之行道，道主生成，濟度一切，物我俱通，故名法服。法者何也，業也合也，洗垢去塵，息欲靜志，專念玄宗，十善為業，行止合道，三界所崇，以正除邪，故謂為法。服者何也，伏也福也，伏從正理，致延福祥，濟度身神，故謂為服。服得其法，法得其方，鍊所登聖，解諸縛纏。修學之夫，除飾存素，弗能裸袒，羣衣未成，拾故摭敗，簷布破皮，浣濯使淨，縫合為衣，不裁新物，去泰去奢，緣此補接。示其條科，法象炁數，叅會二儀，因為取義，思詣無為。為此無為，合道符真，真道何為乎，濟物無滯耳。初學未便，洽此摭敗，卒復難成，遇有簷布，雖新非嫌，但令條數，存擬正法，童子巾闕，餘物悉同，年及昇冠，製巾如法。告師啟道，蒙得成就，禮謝三尊之恩，修行齋戒之集，慎勿酣宴，合會音聲。若笙學子喬，蕭效秦史，琴效虞舜，歌習雙成，韻協雲璈，法不禁耳。世典之醮，習道可停，至於拜尊者，感慈育，盡恭敬，無忽略焉。婚宦啟告，儀唯昇冠。女子受道，初後褐，又有袿，狀類單衣，餘亦皆同。受道心定，治寫經書，便辦法物，勿使有虧，不得假借，牽挽一時。宜先製作，以呈師友，詳覽檢

察，如法與不，不者更易，勿誤後人。如法者錄，須度事竟，解其向衣，仍著法服。向者之衣，亦是先王法服，後世轉訛，是故以今師為定。今師所遵，老君之法，老君被褐懷玉出關，亦著葛巾單衣，玉女侍從，桂扠扠褐裙。聖人無迹，迹有所以化人，人尋聖迹，自然仰合聖心，心得自然，其法最勝。三洞所用，大旨略同，時有所異，皆老君之別科耳。

凡得道昇玄，自然天衣，存世所著，施諸後德，功行未滿，人間命過，時服不兼，身外附體。附體之服，單衣口笥，若在宦佐，著所居位公服，先雖經仕，終時在私，或白衣領職，亡不贈者，皆單衣口笥，不得法服。法服經書，符契券錄，悉還本師，本師已過，付保證朋友，及兒孫弟子堪可付者，若無其人，依畢竟法。畢竟之法，法有三條，一沉深淵，一藏山洞，一淨地焚。若始終山穴，或遊化人間，不婚宦者，並得巾褐。仍故勿新，不得兼重。昔雖婚宦，過時出家，或夫妻共學，不處榮華，雖在人間，與世多異，亦得巾褐。婦妾桂扠，出家則褐，女子在家，修學上法，時入山林，合和靈藥，皆得被褐。功行未足，因緣應過，雖復尸解，亦同扠桂。男則單衣，和光世禮，與世大異者，冠巾被褐，不棺不槨，拂山平石之上，拂林深樹之下，單衾覆之，於地亦可，不須牀席。太古送之曠野，厚衣以薪時火，故火鍊易銷盡。後世封樹，率稱人情，戀慕愛著，不忍棄捐，螻蛄狐烏，終致侵犯，灰土泉壤，永同塵波。石礮用蜃，久已被譏，布囊薄襯，從來見美，為道濟神，形骸可忘，忽營陵墓，費累存亡。悉不得懷協靈文，苟滯法服，沉淪泉曲，幽顯受災。當別營物故之方，鍊度鎮尸之法，轉敗為成，雖妙而苦。能悟此苦，迨及盛年，勤修道術，吾我兼全。吾者悟也，神之別名，我者俄也，形之別號。俄頃應去，悟者長留，留神則形住，住形則神一，一其形神，無上之士也。乖離神體，抑割去留，轉輪方權，中真以上也。不悟而分去，或不分而悲傷，下流之曹也。上士化下，下感從上，身神雖未便一，可得兩順延年，年延功積，自然成一，守此一者，由乎才明。明君訓下，皆當受法，法服為先，先檢身也。諮師請議，檢於口也，習經研旨，檢其心也。檢心以經，不起邪想，檢口以議，無復惡聲，檢身以服，非法不行，行法守一，服為其先也。一有三一、真一、太一，又有玄一。學法大殊，身神裸袒，矯迹激時，應運顯異，焦先之儔，不拘於服。

凡貴賤男女，未奉大道，或已奉道，未受經法，皆各隨方製作衣服，綵素布帛，豐儉適時。若從俗入道，受化為民，民有科戒，未成弟子，佩籙叅法，稟經受圖，乃為弟子，服與民殊。初請法時，深衣袴褶，布巾緼褐，靴履屣屨，叉手手板，隨其土風，因修漸教，不即變革。籙生男者，俱服單衣，巾帕通著，換易任人。古者治職，其衣則同，冠皆進賢，後加介幘，革帶囊綬，笏烏備焉。係師入洛，謂通陽官，改為玄冠，去其綬帶，冠用皂紋，黑羅纓葛

，狀如幅巾，安絃攢緣，簪纓相類，側而著之。禮玄冠不吊，魏武之時，素為此冠，著以相吊，積歷多年，有中書監荀勗，著經樹間，為垂枝所連，遂凹其上。今之恆法，出乎此冠。上古玄冠，生於麻冕，帽之先幅巾而已。幅巾細布四十升者，幅廣二尺，條長四尺五寸六分，其一橫而屈之，縫於兩邊，開下縫髻，垂後覆肩，熱則短之，指周乎髻，齋則解之，加以顏帶。後世儉弊，升細難營，絲葛代充，轉亦下小，是以仲尼之今也純儉，吾從眾。但開闢之初，人皆肉髻，有髮細短，垂下蒙密，名為寒毛，毛卻於寒，故以為稱。羲皇之後，世澆氣薄，肉髻漸消，毛長為妨，邊方或髻或剪，中國攬而鬢之，稍就加飾，覆以取溫，幅巾既用，帽仍生焉。神仙肉髻，細髮如雲，至于黃帝，玄素來儀，頭上霄氣，峨峨通天，授帝妙道，獎垂衣冠，冠冕之興，盛乎此世。世異法殊，因革日滋，尊卑品秩，其冠不同。堯時有觸邪之獸，名為獬豸，其角並向，冠又象之，故名堯幘，著為職任，責罪治惡，其間直分，又名為分。漢元皇帝，額有異毛，不欲露之，復加顏帶繞邊，或幘其上猶空，帶結在後，後遂縫之。至王莽頭禿，始覆其上，上復有冠，尊卑各異。

平天冠者，古之冕也，賢人學士，章甫華山，隨世而生，文武辯別。自古至今，道本一也，相傳轉訛，失清入濁，殺害耽滯，淫祀祈恩，乖道無福，邪精相欺，小鬼強魔，亦有知見，見人先善，德業應興，因妖云好，自為己恩。或人善將歇，凶罰應至，又偽作靈語，戒其禍敗，愚人信之，偶有斯驗，不悉分明，十中其一，謂為聖神，求欲無已，又忿無驗，顛倒性情，喜怒無定，名之為俗。俗者何也，欲也促也，欲滯滅促，故宜遣之。是以大道以無欲為妙，學善之儔，務少私寡慾，欲與少欲，心已不同。勸進學道，服與世異，世不著巾，巾為道法，法乎上古，貴重玄風。其巾有角，本不枵中，枵中象口，出自後人。其前楯角，起於郭氏，後漢徵有道，名泰，字林宗。古不應聘，皆著角巾，林宗嘗行，中途遇雨，角巾折垂，時人慕德，未知其故，競折其中，遂乃楯之，有似崧葉。又揲為三梁，象於進賢冠梁，其數各異，一梁象一角獸，六合同歸，一角獸出；二梁象二角獸，獄訟正平，二角獸出；三梁象三角獸，王者法度修明，三統得所，三角獸出。諸所象者，皆感德而生，學道是以著之。花葉之盛，莫過芙蓉，道貴其義，又象其葉焉。高下大小，取適隨人，少髮安帶，不用垂纓，總而言之，名芙蓉巾也。別有芙蓉之冠，周人謂為委貌，裝製小異，體用大同，本是諸天神聖高德之冠，皆結三素紫雲，或七色霄霞，或九光精炁，自然成冠，冠乎肉結，通暢身神，身神清虛，結而非礙，似肉似骨，似皮似血，似筋似脉，似有似無，為而無為，有而非有，非有故無累，無為故常全。諸似而非，皆是真炁，真炁本一，化為眾形，形以合神，神與形一，一不相離，無復毀成。是以太上妙體，常住玉京，得道眼通，自然能見

。凡夫肉眼，豈得覩之，覩之由學，學精必通，通感之時，神官降賜，神物備至，衣冠為高。昔天真皇人，以遺帝佶，茅君九錫，又蒙此冠，受三洞者，皆得冠之，始學德輕，不可妄著。

凡未受籙，乃得受經，習戒建德，如說修行，自得道真，不假受籙。未能全怯，六道須明，緣階而進，宜受治籙。籙生道民，必應送租，租不送者，不得治籙。於租雖闕，无妨受經，受經服異，業亦殊科，科異服殊，陰陽相類，仕者共奉一君，學者同宗一道。畫績綵色，動靜各品，皆有意義，別見諸書，難可備憶，大略應知。夫冕者勉也，勉勵立德，免諸塵灾。冠者觀也，德美可觀，物所瞻覩。巾者潔也，斂束潔淨，通神明也。帽者燾也，覆燾身首，如雲霧也。或象山林，或法日月，方圓大小，隨位著形。龍衣華服，明德所堪，單衣通著，本是深衣，衣此深衣，學以正心，心得深理，終入宗源。後世易從，除其下齋，單亦可行，故予單衣，公服之裏，仍名中單。褐者遏也，遏惡揚善。帔者披也，披道化物。裙者歸也，萬福所歸。一名曰裳，裳者常也，慮迷失道，常存得常。女子桂，道繼真，以防諸惡，義與褐同。一切諸衣、效此取解。至於邊地遠鄉，蠻夷戎狄，或縱或橫，亦有畫績，奉道事神，亦有法服，方俗多殊，冠帽彌異，或平或尖，或高或下，或似鳥獸，或如虫魚，損益雖侷，標飭可知。跪禮揖讓，多不相同，叉手執笏，各各隨時。然三皇以前，斂手標敬，五帝以後，執笏明恭。笏者何也，忽也勿也。軒轅之世，以竹為之，長二尺四寸，廣三寸，厚三分，飭以象骨，加以魚須，持之於手，插筆於頭，君上有命，恐勿有忘，是以書之，使勿漏失，遵奉施行，記之簡牘，畢則拭之，有事如先。三代務多，精竹難得，以材代之。天子玉笏，製亦微異，長或三尺、二尺六寸，廣乃同厚五分，插筆笏上，挾之脇間。漢初功臣，爭勳勝負，急論相加，抽笏相擊，高祖使叔孫通定禮儀，除其此弊，乃斷笏令小，咸同一度，長一尺二寸，廣一寸六分，厚三分，示存書命之法，不可致虧，執之申虔，無復相擊之用。所以內外學士，皆共秉持，抑願道君，賜垂勅誨，書錄修行，不敢忽妄。聽講之時，各執經卷，猶應有板，不可暫捐。執經卷者，皆以淨巾裹而勿露，開則巾襯，存避埃塵。履者何也，理也，非禮不動，非理不行，行則善理，唯禮是從，從禮得理，入道成真。舄者釋也，解除滯蹤，准此而思，觸長無惑矣。服御七耀，修行六通，積久有驗，炁冠身形，圓光炎色，妙綵自然，成冠及服，炁皆通天，履板眾飭，悉是炁為，應感而成，無所不備。世有相板之法，法數小異，此儀術入善，方無累道也。

凡受經緡官，皆巾單衣，亦布裙褐。山居出家，悉鹿皮巾褐，與慶鹿為羣，不使野物驚異。有德之士，能化於人，人獵在山，感此有德，獻其所蓄。所蓄者，皮鹿者為勝，勝以進德，盡其敬心，心敬可引，不逆其意，方使其來

，稍如開喻，為其著之，以慰其心，非所苟用。削落裸袒，散髮玄溜，亦可與龍螭為儔，何必與慶麀為侶，但射獵之人，多衣鹿皮，亦欲不驚於獸，此心與道本乖，及其感悟，知道可崇，解衣表懷，故宜為受。先推讓之，示以謙意，微叙道科，不妄受施，受施為著，唯善是修，作其福田，獎其感志，非此之為，不須皮服。但箸籠巾，玄黃其色，不欲灼灼光明，指令變白，不損乎綵，所以桂汁染之，香而易辨。黃裳元吉，本在可通，諸經名法，正綵并用。其綵各專其事，事未能專，不得顯正，是以挂迤黃，不妨精能精專，雖未著之，彌感督勸，能深入於神府，上則轉忝成妙服，次則解褐被絳綃也。

凡登天入洞，受位三清，遊三界之外，化三界之中，宜須挫銳顯異之時，則錦帔飛青，雲光綺繡，玳瑁纓絡，種種莊嚴；宜須和光示同之日，則被褐懷玉，帶索鼓琴。同而有異，異不傷同，同不累異，是謂真人。女子治錄，及初受經，裙羅黃桂，與男不殊，絞綃布葛，生熟隨時。若受經法，俱得有帔，玄黃單複，布帛適人，裙褐及扞，唯單無複，被及褐條，各有所法，然隨人長短，大小相稱，勿令拘法，法施中人，至於條數，一切無異。男女生官，不得以帔奏章，啟齋得道，亦不得著帔，讀經聽講，帔皆可通。女子執板，禮如丈夫，不得平身，習世跪拜，咸去花釵，勿用珠玉，金銀眾寶，悉不得施。當以蒿角竹鐵為釵，素淨勿多，每存玄甚，省約在心，有而不滯。又不得高髻盤頭，長帶娼飭，悉應短帶促衣，小鬢下子，拔而垂之，正前勿邪，三分微鬢。香油得用，無過脂澤，急遣冶容，動止正真，姿質請嚴，象於仙女頰雲之髻，法於玉真芳淨之儀。不得著巾冠，不得傅粉黛，山林著褐，鹿皮籠布，草履層等，與男亦同。寒則著帽，行滕履通，祈請脫帽，勿服縈巾，夫妻官學，道世兼弘，青扞素要，紅紫為裙，位德尊宿，紫素並行，紅絳縹綠，紋縵无嫌。紋則散花九躡，勿用仙人獸形，錦綉韜綺，畫纈織成，暎刻鏤薄，皆不得施。法服如科，神童侍衛，不得法者，鬼反害人。朝禮讀經，齋戒祈請，問訊師宗，皆得著之。朝廷往來，吊喪問疾，園苑遨遊，溷濁之處，路陌之間，并不得著。出家山居，終身著之，暫出人間，亦不須變，无忌穢淹，不擇憂勞，弊則更新，補接唯淨。同學共志，亦得相給，或故作新好，供奉師友，及諸道義門徒，賜乞隨時，先應啟告。啟告三寶，陳有兼長，某人今無，請以周急，神童付授，幽顯分明，如此玄復，可得施與。受者禮道，啟告蒙遺，然後著之，慙荷在心，不得誇耀，欣喜為奇。彼其之子，不稱其服，著之戰懼，如臨深淵。法雖籠布，熱財輕疏，勿貪細滑，華靡在身，違法有灾，各宜恭慎。裙襦衫等，人人所諳，褐帔條制，世少能究，精詳今記，兼諮明師也。

擇師訣第九

夫欲擇師，諦思自然，自然之理，有陰有陽，陽貴陰賤，勢運相成，成无

貴賤，平等一元。元炁既散，求合未諧，男尊女卑，元由謙讓，能勤謙讓，雖女成尊，謙讓不勤，雖男成賤，賤而知勤，得崇由讓。導物還宗，宗主最貴，貴之為尊，尊在乎道。所以人无貴賤，道在則尊，尊道貴德，必崇其人，其人体道，含德厚淳，雖是女子，男亦師之。父師其子，君師其臣，奴婢僕使，僮客夷蠻，道之所在，緣之所遭，高下雖殊，皆當師事，勿以迹賤，而廢其道，不可居貴，自高失德。人多滯貴，蚩鄙卑賤，道破此迷，多託猥陋。或出異域，竊醜其形，或謬其語，或毀正經，猖狂倣儻，穢濁无常，感激眾滯，明者悟之，闇者疑亂，見者醉昏，醉昏非真，所致疑亂，本是俗常，常俗流宕，去源轉遼，學道反之，知常曰明也。

為師訣第十

夫為人師，精守玄一，一為萬宗，不得有漏。來者無卻，賦道隨堪，採察其志，獎厲其緣，祛遣其滯，發暢其才，顯明其德，品次其功，能否无謬，人神協和。常居謙退，无兆矜誇，將護一切，莫生怨根，斷絕惡本，增長善源。慎勿空言，言依經誥，演議明法，幽顯令通，彼我无惑，疑忌永忘，塵疵既遣，神靈往來，萬願日新，一切咸濟。志行此道，存文五千，文千雖五，義冠无央，先代相傳，師資叵計。今之所遵，十天大字，神仙人鬼，共所歸宗，文同數等，无有一異。但感者未齊，應者微革，河上《章句》、係師《想爾》，轉字會時，立題標議，始殊終同，隨因趣果，洞明之師，諦宜宣誥。其大字以數入道，故先言五千，而後云經；《想爾》以道統數，故先云經，而後言五千；《河上》道數相涉，故分經以及文，品章為第句，各有應焉。妙思之儔，研期感應，勿互舛亂筌蹄也。《五千文》包羅備周，眾經祖宗，三洞支條，先分後合，終歸道德，乃極一源也。人生多端，大階三品，小中至大，大洞大上。中小之士，所濟者安，才智洪纖，大者常少。所以眾聖先出小法三皇，先身然後及物，物乃是大非小。小才之始，始於修身，自得入中，從中至大，故有三洞，洞神、洞玄、洞真是也。師三洞可為大，師一二洞間，小師而已。勿自嘖嘖，虛言吾大。夫實大者，時所不須，觀方設教，亦託為小。小中二法，化物為急，物多小知，不可與太牢饗孩兒，慈母所不任也；乳哺薦雄壯，聖師所不為矣。

三洞之根在三千，三洞之技，技出无量，中國四夷，處處敷陳，源旨不異，流迹不同，神鬼人物，各有文字。或單或複，或少或多，或音同義異，或音異義同，或興或廢，或實或虛。師當精詳，隨感示應，至誠可就者，指訣付之，緣未頓得者，片滴與之，不可非其人妄開，是其人強閉，閉開取感，感應無疑，然後可傳，有疑急止，不宜斥言者，方便遷延，一依師訣，勿溺情致灾也。

上學之士，輕財重道，下俗之人，輕道重財。對累身命，多藏厚亡。是以聖師，行道散對，財去道降，積德長存，長存不亡，无復所待，則非所須，有則利物，富有四海，故嘗无累，明者達斯，无滯財矣。然學未成真，實未无待，待衣及食，法物所須，皆當運力，用天之道，分地之利，行師之法，非法不取，非力不求，非道不用，此上學之士也。學未得道，當須衣食，衣食不能令人得道，急宜稍損以營法，忍飢與寒，少時為苦，從法得道，永保常樂。前劫後劫，无窮聖人，莫不因茲，以成上德。且捨財是其一源，至用復有三議，一者神官所須，二者因物示理，三者去色消殃。此之三議，不可改易，不可減增，亦不可闕。弟子貧窮，不能頓辦，而心行超眾，師為奏言，今闕後補，不敢有違。若廕門內，身命委師，无有私財，師為代出。若神師重降，改闕隨宜，一依凡師，不得輒易，慎勿私除，以為己惠，又勿增益，以要他財。神官所須，及非明義，不能消殃，更致結考，誤人失道，嚴加慎之。

上學之人，不妄為師，自非真聖，道德備周，不得化一人、叨居師位。世衰道隱，真聖潛藏，末運人籠，不能招致，其間自有中人以上，企及上學，得聖經圖，雖未通達，當相獎成，先覺教後，遞為師資。尺有所短，寸有所長，尺短師乎寸長，寸長不得浚乎尺短。凡未能圓足，必各有所長，前受後請，更相師友。自量无片勝彼，彼投則固讓之，詞不獲己，說度就他，不得貪其財力，空留為榮，誇云己有，終後遂无，彼此相誤，求吉得凶矣。

凡為大師，容納一切，來无所卻，去无所追，无偏无黨，存公屏私，賞善罰惡，不濫不侵，往反眷屬，无親无疏，慎言少語，无分誚譏，彼醜見加，以美相報，華素取中，矯則隨時。弟子多端，簡試勿亂，有至心樂道者，或慕榮利者，或苟求衣食者，或上逼不獲己者，或邪謂求異同者，如此之流，宜分別之，抑之引之，防之處之，不使為灾。或有帝王，爰及將相，豪雄凶暴，恃力乘威，迫脇覓法者，方便對之，釋之解之，辭之避之，无令致害也。逆備有術，諦宜遵行之，為師之遵，如父如兄，為資之體，如弟如子，吉凶是同，不得相負。從師則合，背師則離，離无追怨之言，合无過美之語，與奪必當，幽顯唯平，不得虛張。功過乖實，妄諂毀譽，任心違道，師資連禍，皆招重灾。男女不得私受，尊卑不得混同，住止有異，行道有殊，各依科典，虧即考臻。有來投者，核問由來，必非叛師，又非邪逸，口墨誓辭，保舉知識，然後可容，不得謾昧，有疑檢問，須實乃停，有虛詐者，慰喻遣之。或久經接事，求進新階，或未宜便與，或无以與之，悒悒欲去，隨時發遣，不得禁固，拘錄傷和，妬道破德，誤人失真。妄欲去者，善誘留之，不可止者，又勿苦停，是其緣淺，功不能深，氣矜无患，法事存之，如此陰德，成上真也。

凡在動境，守靜未篤，雖學寡欲，不能无私，私則生過，過有淺深，師自

知過，歸悔三尊，禮懺洗心，誓不二。弟子有失，隨事罰之，或言或杖，或禮或閉，目限多少，依太真科，罰以懈怠，使其改惡，制伏心形，令其思善，不得忿恨。退責遷怒，怒責不已，師反受災。能不懷憾，更加善言，解譬勸勵，則亨利貞。弟子有過，或不自知之，或故犯，小大宜詳，可恕則重申明誠文，不可置則施行楚默。失儀懈慢，謬誤遺忘，皆是小愆，不足深譴。欺罔姦盜，此為大尤，嚴加重責，以絕惡根。受罰无怨，後能自新，斷功限竟，欲還服膺，或經委遁，反迷歸門，皆當接納，更布德音。又犯復責，不得過三，三犯之後，師不得容，移之四遠，普勿採錄。凶暴醜逆者，公法剪之，可漸防萌，不致巨惡。惡者不化，聖所未知，要當內外禁衛，以術御之，无令發越，辱道毀神。凡能改悔，雖大可赦，不能悛易，雖小勿弘，欺罔姦盜，革則還善，善積成真，故疊自洗。滌本欺罔於先生，蔡經有欲於神女，龍威竊夏禹之寶書，東方朔偷王母之桃實，並無累於得道，皆由能改之所招也。諸為大師，防資邪始，不可遏者，肆則治之，許其令終，三故有限，嚴戒其資，不可恃此效尤，覆軌一則已，其二三之恩，難必覲矣。

師抱一，其迹有三，三迹隨世，世有不同，不同雖多，略歸三品，一曰動靜，二曰心靜，三曰真靜。動靜者，建立館治，繕寫經圖，申明要教，宣暢玄風，來則訓之，勸而不苦，去則誨之，導而弗牽，退者時引，進者時抑，抑引取中，迴動還靜，反者道動，入靜根，守此能篤，利物濟身，明之者鮮，用戶牖之無也。心靜者，道德內充，行方布術，履世歷山，神仙遊集，救度眾生，託形凡庶，出入市朝，薄官易黜，潛化有心，觸之則色斯舉矣，會之則應感來儀，密受奇方，功成身退，或出或處，測之者希，用埏壇之无也。真靜者，愛身保神，不滯不洿，乘法執中，不屈不折，匡世救時，唯嚴唯功，可濟則濟，不可則捨，適彼樂土，毗輔諸方，計日剋時，无虧无替，周歷四遠，帝君以下，至于兆庶，教之喻之，不憇不休，運昇乃已，人莫之知，用三十幅之无也。弘此三无，成一妙有，上學之師，於茲乎在也。

洞真太上太霄琅書卷之四竟

洞真太上太霄琅書卷之五

師資行事

書經訣第十一

凡得經有已，皆應更書，先者為鎮，供養而已。今所寫治，精加校定，豐財足力，各立三通，一為長鎮，一為供齋，一為研習。研習者，嘗自隨所住室中，別置格上，躬自出入，不得使他。若家人、弟子，同炁至心，可得使之，亦勿全委，非其故為怠慢，學淺識解未精，或致忤禁，彼此受殃，明詳謹慎，納吉防凶。寫經之時，皆修清齋，法當手書，與師易本。或在門伏膺雜役

，不暇自書，或未閑筆墨，或遲拙不精，富者可以金帛顧人，貧者聽得傭夫聚直，必借妙迹，不可苟營。文字訛謬，圖象失形，並有考罰，福豈爰臻。經中有圖，圖或別卷，各有侍官，典圖真吏，玉童玉女，與經略同。不可逐易避難，起經棄圖。象誤許洗浴，一紙不過三處，簡素一紙亦不過三，過三皆易，火淨所誤。連染剪齊，首軸帶袂，囊蘊巾帔，廚箱令堅，完淨而已，不得過華。世間教化，化世捨華，華未能捨，權制用華，使世間人，損俗華麗，華麗供法，漸識素方，得素後華，自然不壞，不求自得，不為自成，自然而然，莫能使之不然，緣素果此，勿滯俗華。臺堂行裝，各有豐儉，富貧相稱，不得強為，富者強陋，貧者彊華，華奢陋儉，皆乖道制，道制貴中，內外相應。非工意去失，首謝愆尤，清齋懺悔，各依太真之科。久壞改易，具如太真之法。香燈禮拜，尊修唯精，精必成聖，與道合真也。

啟告訣第十二

弟子因緣，憑師請法，宣傳付者，先使寫經，圖錄已竟，擇日結齋，齋時啟告，大略如左。

齋法雖多，皆准三元，三元齋科，

包羅諸法，授受上經，同用上元，其間所啟，事源隨時，消息改易，簡要勿繁也。

凡齋啟告，先治辭牒，不可闡漫，率略千真。為牒之宜，先稱某國號、某年太歲某、某月朔某日某時、某州郡縣鄉里、某位男女官、祭酒道士先生真人元君夫人姓名，今於某州郡縣鄉里、山舍治館宮府第宅，就某州郡縣鄉里、男女道士法師姓名，受大洞真經，目錄如左。洞真部卷第如干，以次書之。緣都得者，謹依第至後，緣偏得者，未宜并授，隨宜出之，不須卷第，直舉篇名多少，依實一二條之。右如干卷，今對齋啟告傳度，謹牒。

某州郡縣鄉里，某位姓名辭，幸籍善緣，歲奉玄極，叅受寶文，誠懼誠慰，妄以短命，志願長生，貪進忘退，遭逢嘉辰，乞請受前件如干卷，依科交賚某等如干種法信，奉辭以聞，伏願師君賜垂許，誓心修行，不負師道，有違之日，自分風刀，不敢有怨，一依明科，謹辭。

太歲某某月日時，於某山舍奉。

傳諱訣第十三

凡傳經寶，要在存師，師之所師，所師之師，三人鄉居，男女位號，姓名字年，傳經處所，付授弟子，黃素書之，

佩帶自隨，不可去失，去失謫罰，皆如太真之科。不常帶者，附著經中，別以巾蘊裹結。令堅師、所師、玄師，師青童大君，又有小君，存此二君，禮願如法。

法信訣第十四

法信出科，科與經異，師師口訣，各有因緣，時科事革，所以不同，慎疑或，從師施行，若无師者，啟玄有儀，依格出信，不得有違。卷卷別受，科科稍傳，經科相叅，師資量准，雖以輕易重，以易除難，要當思想物儀，不乖其方，因緣能得。頓受者所用如左：

- 一、上金九兩；
- 二、紫錦百二十尺；
- 三、五色紋繒各四十尺；
- 四、白素一千二百尺；
- 五、紫紋二十四丈；
- 六、命綵支干相入，紋繒隨年；疋丈尺。
- 七、五色絲各三斤；
- 八、五種香各九斤；
- 九、玉龍、玉魚各三軀；
- 十、金龍、金魚各五軀；
- 十一、玉鴈、玉羊各一軀；
- 十二、金鴈、金羊各一軀；
- 十三、玉札三枚；
- 十四、金環、銀環各九雙；
- 十五、真珠如梧子大，三百六十枚；
- 十六、五色綿各依方斤數；
- 十七、大度紙三百六十幅；
- 十八、筆五雙；
- 十九、龍頭書刀五枚；
- 二十、紫蓋紅裏一張；三副朱染頭子，金銀交具。
- 二十一、青蓋碧裏五張；三副烏漆頭子，牙銅交具。
- 二十二、明鏡一面；徑尺者，不得或九寸。
- 二十三、法服冠履手、板一具；精籠取中，新淨香潔。
- 二十四、淨罌與盤各一枚，金銀銅瓦夾紵隨時。

右二十四種，某受經法信。此二十四物，各有所應，積聚營之，不可闕一。窮地之鄉，許用他物准類充補，擬議勿

乖。又无即充，可注今闕某物，須受法之後，營覓補備。

結齋之始，投辭之初，便應備辦，諮啟師尊，有无注奠，都定書之，續置經目之後，連在辭文、之前，啟告之初并讀，至後臨度經時，出官奏表，又具

言之，慎勿忽略也。

師受此信，依按明科，施用必得其所，彼此共保成真。若應玄盟，亦按此法，准採金書之後，散施之儀，經書不具，勿用此訣。大人上志，精詳遵承也。

太真九科第十五

太上太真王，制科成諸法，布在眾經，或前或後，覽者不別，宜尋本文。本文三卷，師之所祕，得之密習，為天人師。今此大要，標略有九，九天真人，共所遵用，教化无之，動靜陷咎。若有賢朋智慧之士，求受寶經，當示以要律，授受之宜，欣用九條，觸類求之，无所不具。自非體真，勿妄增損，三洞眾經，共准依按。太極真人、西城王君、仙公卿士，高才大人，皆寶祕之，慎無泄矣。

第一科曰：齋竟授戒，授戒之後，按儀傳經，傳經之年，即為期限。限以制心，期以見道，道為眾妙之主，觀妙必覩其宗。除欲為上，少欲次之，深淺隨才，優劣依德。德量无崖，大分有六：第一四萬劫，第二四萬年，第三四千歲，第四四百齡，第五四十載，第六正四周。周劫限竟，得傳一人，至乎九人，明道之尊，德之貴也。運促時急，大慈廣救，遇賢便傳，不拘定數。但初受須微，限中求驗。若期內逢險，為凶所逼，智力不能化遜，須以避灾，所得之旨，在乎心中，无滯卷軸，致傷玄真。若威勢所制，使迫胁本，自度後能治彼，以全初志者，乃可請師，暫順彼意，不能如此，以死絕之，慎勿殺辱本師，毀棄正道。若智力不能辦，勿強云欲治之，不度德，不量力，滅身命，无成功，徒增罪耳。善宜三思。若意外去失，不自覺知，或劫賊所掠，弗測存亡，皆長齋懺悔，捨身命財，憑師積年，竭盡單欸，無生怨怠，乃更受之，受之三失，勿復苟受，宜加懺悔，至到感靈，然後更受，必登道真。无感徒受，受終无所成，為後作因，受勝不受。受之不己，心神轉易，初雖无成，終亦得道。

第二科曰：受經之後，諦尋師訓，含光內皎，不得炫耀。年限既竟，乃得傳賢，賢不易有，不可妄傳非其人，彼此風刀，上延先祖，下逮子孫，惡深絕種，長充鬼徒。若限內有灾，或家門喪死，公私鬪諍，血傷牢獄，水火盜賊，重病輻軻，年限雖過，不得傳人。正當謝罪，懃立善功，告樂如期，乃可有授。若三尊壽考，運數昇度，或非罪无辜，橫羅縲紲，此皆无妨，依期得傳。

第三科曰：一信素證心，炳發妙義，必令精好，以理得之。正分所辨，撰蓄密營，不可誇談，勿生恠惜。慎莫邪求，換乞強索，竊略所得，自以為功，更增咎謫，无福可期。師受善用，三八之，一分為弟子營齋，助贍香油經籍；一分救諸山栖幽苦；一分供師法服精籬，奉給三尊，不得私散。散之依法

，无起慳心，不可貪聚，招禍累身，損道辱法，取誚人神。權急偏濟，時宜并用，先啟三寶，後計補充，有違招考，竊盜律論。靈皇同壇者，依十二科法

第四科曰：受經之後，存禮无虧，若遭病急非意，公私事礙致闕，迴後即謝，啟悔慙悚，竭洗丹衷。若浮游淫泆，逐樂驕慢，違替之疊，長陷酆都。

第五科曰：法應長齋，未能者擇其吉會，申其誠心。年有六月，月有十直，又不能全者，朔半及晦、四時八節、本命生日，隨所堪修，不可都廢，廢則无功。忘道棄法，招延凶灾，非意破齋，即應懺謝，重犯不悔，後墮魔群，興之無懈，不破不退，存道揚法，物我兼通，成聖有期，受號玄德。長齋月：正月、三月、五月、七月、九月、十一月，一年六月，月皆用奇，因陽之盛，建陰之功。功屬各有日，一月直十辰，一、八、十四、十五、十八、二十三、二十四、二十八、二十九、三十日。

第六科曰：齋讀經戒，諳練誦習，講說宣明，日求妙解，解必行之，勿犯所解，犯即懺謝，不可重為，行坐存文，不得怠忘。若隱閉自知，欺罔人物，不戒成敗，嫩答諮疑，厭問嫉勝，濫瀾詭辭，或虛解詐知噴高誤眾，破壞文句，增減篇章，妄造邪議，苟生異端，違真越正，皆致深殃。

第七科曰：宣揚經戒，建德立功，矯假，方便利益，須智慧才。才未深達，不可輕行，乖方便體，便入妄言。但依實旨，引導同心，俱歸師門，看經讀戒，證明妙理，起發善心，使預齋觀化，令聞見福緣，勸喜相順，和而成功，不得呵責，忿激增愆。譬喻誘進弗可強牽，將護節量，剛柔取衷，一與一奪，種種潤之，確迷不轉哀矜勿怵，慈悲无已，不生棄心，得善知識，誓俱登玄，貴師愛資，克果上真。

第八科曰：師愍弟子，平等一心，无所偏頗，賞罰必明，罰以止惡，賞以勸善，纖毫无遺，涓芥勿謬，謬偏被灾，幽顯重考。

第九科曰：弟子恭慎，事師无二，寡動少言，沉懿靜篤，伺候師顏，諮稟妙訣，思樹效績，輔讚三寶，專心竭力，奉命便行，水火不避，遠近弗辭，疑即啟審，許革則悛，不許仍從，有殞无避。師試弟子，令其心堅，登道入真，階級優劣，使其識悟，日分所之，督勵彌精，克弘至道。凡師威神薄，不可妄試人，聖明之師，試无損敗，吉凶逆順，一隨明師。若遭惡師，法无惡，惡由己招，死不得怨，正應自責，改往修來。若猶豫疑師，不宜奉事，事則順從，不得違逆，逆則失道，永嬰塗炭，明各慎始，勉勗令終。

右九科，九宮真人申明此要，十方已得道无量大聖眾，咸共遵行，拯度一切。

洞真太上太霄琅書卷之五竟

洞真太上太霄琅書卷之六

齋戒要訣

為同義救厄疾謝罪請福寮出官訣第十六

師徒長齋，无事不解，有人告急，皆啟解齋，人來及往，皆依科制。三元出官，常所施用，貴賤疾厄，公私非常，悉備壇堂，及得密室，或在閑庭，或就山水，白日夜半，隨時量宜，唯貴清淨，不雨不風，不寒不熱，不喧不驚，或積風雨，時應熱寒，不得避之，要存隱寂。壇庭立幕，門門周席，經座香案，然燭連燈，三十二人出，嗽呪一如常法，出官異於三元。今書立成為主，如左出官儀：

謹出臣某妾等身中，无為直齋左右功曹，各百二十人出。

无為輝神太初直齋功曹，百二十人出。

无為太極直齋功曹，百二十人出。

无為太素直齋功曹，百二十人出。

高上玉清元皇直齋功曹，百二十人出。

无極玉清玄上直齋功曹，百二十人出。

无極太清三十六直齋功曹，百二十人出。

高上玉清洞虛直齋功曹，百二十人出。

玉清紫虛南上直齋功曹，百二十人出。

玉清虛明直齋功曹，百二十人出。

无上太真直齋功曹，百二十人出。

玄虛洞寶君直齋功曹，百二十人出。

无上正平君直齋功曹，百二十人出。

无上太平君直齋功曹，百二十人出。

无上正真君直齋功曹，百二十人出。

无上明威君直齋功曹，百二十人出。

紫清北玄君真齋功曹，百二十人出。

无為揮神執整直齋功曹，百二十人出。

紫清南朱直齋功曹，百二十人出。

无為度世直齋功曹，百二十人出。

紫清西華直齋功曹，百二十人出。

无極太虛直齋功曹，百二十人出。

紫清東明高上直齋功曹，百二十人出。

无為安國直齋功曹，百二十四人出。

紫清中元皇道直齋功曹，百二十人出。

无為安民直齋功曹，百二十人出。

紫清五靈直齋功曹，百二十人出。
紫清三元直齋功曹，百二十人出。
玉清大洞直齋功曹，百二十人出。
高清四極直齋功曹，百二十人出。
玉清玄洞直齋功曹，百二十人出。
主清洞真直齋功曹，百二十人出。
玉清太帝直齋功曹，百二十人出。
高清上中黃直齋功曹，百二十人出。
上清玉晨大道直齋功曹，百二十人出。
高上紫映直齋功曹，百二十人出。
上清洞玄靈寶直齋功曹，百二十人出。
上清洞真天寶直齋功曹，百二十人出。
上清洞神神寶直齋功曹，百二十人出。
上清高虛君直齋功曹，百二十人出。
上清太微天帝君直齋功曹，百二十人出。
无上黃老直齋功曹，百二十人出。
太上太一北君直齋功曹，百二十人出。
太一北君洞玄監齋功曹，百二十人出。
洞天三皇上帝直齋功曹，百二十人出。
上清九道高元直齋功曹，百二十人出。
上清八素直齋功曹，百二十人出。
上清龜臺九靈三母直齋功曹，百二十人出。
无上五老直齋功曹，百二十人出。
上清飛神中央黃老直齋功曹，百二十人出。
无上九老仙都直齋功曹，百二十人出。
上清東霞扶桑直齋功曹，百二十人出。
无上依公直齋功曹，百二十人出。
上清金闕後聖直齋功曹，百二十人出。
无上黃元直齋功曹，百二十人出。
上清東海青華小童直齋功曹，百二十人出。
高上直齋功曹，百二十人出。
上清二十四帝統仙直齋功曹，百二十人出。
高上直齋玉童，百二十人出。
无上直齋百僚功曹，百二十人出。

高上直齋玉女，百二十人出。
无上丙節直齋功曹，百二十人出。
无上直齋僕射，百二十人出。
无上直齋都官僕射，百二十人出。
无上直齋三官僕射，各百二十人出。
无上直齋刺姦僕射，百二十人出。
高上直齋都候僕射，百二十人出。
高上直齋糾察僕射，百二十人出。
無為直齋都統僕射，百二十人出。
無為直齋元靈僕射，百二十人出。
上清直齋僕射，百二十人出。
无上直齋僕射，百二十人出。
太帝直齋僕射，百二十人出。
太一直齋僕射，百二十人出。
靈寶直齋僕射，百二十人出。
天寶直齋僕射，百二十人出。
神寶直齋僕射，百二十人出。
太一直齋洞章僕射，百二十人出。
無父直齋僕射，百二十人出。
玄母直齋僕射，百二十人出。
黃元直齋僕射，百二十人出。
太平直齋僕射，百二十人出。
五老直齋僕射，百二十人出。
無為直齋領天百二十曹僕射，百二十人出。
无上直齋無先僕射，百二十人出。
玉清无上王直齋僕射，百二十人出。
無始王直齋僕射，百二十人出。
无上九天王直齋僕射，各百二十人出。
無為記仙直齋僕射，百二十人出。
无上倒地直齋僕射，百二十人出。
高上更生直齋僕射，百二十人出。
无上大劫直齋僕射，百二十人出。
无上黃樂直齋僕射，百二十人出。
无上太玄直齋僕射，百二十人出。

无上小劫直齋僕射，百二十人出。
无上總統謁者直齋僕射，百二十人出。
高上破敵直齋僕射，百二十人出。
無為太和直齋僕射，百二十人出。
无上六合直齋功曹僕射，百二十人出。
無為勇平直齋功曹僕射，百二十人出。
无上承上天直齋功曹僕射，百二十人出。
无上伐逆直齋功曹僕射，百二十人出。
無為直齋黃鐵功曹僕射，百二十人出。
无上統羽林直齋功曹僕射，百二十人出。
帶單无量天王直齋功曹僕射，百二十人出。
上上禪善无量壽天王直齋功曹僕射，百二十人出。
上監天王直齋功曹僕射，百二十人出。
寂然兜術天王直齋功曹僕射，百二十人出。
不驕樂天王直齋功曹僕射，百二十人出。
應化聲天王直齋功曹僕射，百二十人出。
梵寶天王直齋功曹僕射，百二十人出。
梵摩迦夷天王直齋功曹僕射，百二十人出。
波梨答怛天王直齋功曹僕射使者，百二十人出。
玉清上真王功曹僕射，百二十人出。
玉清上真王功曹僕射使者，百二十人出。
玉清威上王功曹僕射使者，百二十人出。
玉清平天王功曹僕射使者，百二十人出。
紫清虛无王功曹僕射使者，百二十人出。
紫清虛无王功曹僕射百二十人出。
玉清領仙王功曹僕射使者，百二十人出。
玉清寶靈王功曹僕射使者，百二十人出。
玉清九幽王功曹僕射使者，百二十人出。
皇虛八正王功曹僕射使者，百二十人出。
玉清九天王功曹僕射使者，百二十人出。
玉清洞變王功曹僕射使者，百二十人出。
玉虛騰觀王功曹僕射使者，百二十人出。
紫清上歸王功曹僕射使者，百二十人出。
高清條上王功曹僕射使者，百二十人出。

高智慧上王功曹僕射使者，百二十人出。
高清超上王功曹僕射使者，百二十人出。
高清領訣王功曹僕射使者，百二十人出。
上清虛上王功曹僕射使者，百二十人出。
上清察上王功曹僕射使者，百二十人出。
高穹上皇王功曹僕射使者，百二十人出。
高皇太上王功曹僕射使者，百二十人出。
高混事王功曹僕射使者，百二十人出。
上皇高皆王功曹僕射使者，百二十人出。
上皇攝正王功曹僕射使者，百二十人出。
上高九夷臨察王功曹僕射使者，各百二十人出。
皇虛均上王功曹僕射使者，百二十人出。
高上西司功曹僕射使者，百二十人出。
高玄德王功曹僕射使者，百二十人出。
紫清北上王功曹僕射使者，百二十人出。
紫清中元王功曹僕射使者，百二十人出。
玄虛安國王功曹僕射使者，百二十人出。
玉清依上王功曹僕射使者，百二十人出。
玉清素上王功曹僕射使者，百二十人出。
玉清懷上王功曹僕射使者，百二十人出。
玉清念國王功曹僕射使者，百二十人出。
玉清迴上王功曹僕射使者，百二十人出。
玉清丙上王功曹僕射使者，百二十人出。
无為直齋使者，百二十人出。
玉清樂觀王功曹僕射使者，百二十人出。
无上太玄直齋使者，各百二十人出。
无上直齋使者，百二十人出。
无為直齋監齋使者，百二十人出。
无為直齋監章使者，百二十人出。
无為黃元直齋使者，百二十人出。
太一直齋使者，百二十人出。
高上直齋使者，百二十人出。
太一直齋奏章使者，百二十人出。
太一直齋奏章謁者，百二十人出。

太一直齋御章使者，百二十人出。
太一直齋奉章使者，百二十人出。
玉清直齋使者，百二十人出。
靈寶直齋使者，百二十人出。
无上直齋直事使者，百二十人出。
无上直齋監齋使者，百二十人出。
无上直齋糺事使者，百二十人出。
无上直齋羽衣直事使者，百二十人出。
无上直齋奏章從事，百二十人出。
无上直齋御章從事，百二十人出。
依公直齋使者，百二十人出。
三五赤天直齋伐逆使者，百二十人出。
无上直齋監齋使者，百二十人出。
无上直齋都官使者，百二十人出。
无上直齋奏章謁者，百二十人出。
玉清二十四帝總攝直齋使者，各百二十人出。
无為揮神都督天百二十曹直齋使者，各百二十人出。
玉清无上天王直齋使者，百二十人出。
太真王直齋使者，百二十人出。
太帝直齋使者，百二十人出。
无上都督百二十曹使者，各百二十人，督諸官各佩羽衣、朱陽之幘、九德之冠出。无為揮神兵馬九億萬騎出。
无為太始兵馬九億萬騎出。
无為太初兵馬九億萬騎出。
无為太極兵馬九億萬騎出。
无為太素兵馬九億萬騎出。
玉清兵馬九億萬騎出。
太帝兵馬九億萬騎出。
高上兵馬九億萬騎出。
紫虛兵馬九億萬騎出。
玉晨兵馬九億萬騎出。
紫清兵馬九億萬騎出。
紫陽兵馬九億萬騎出。
三皇兵馬九億萬騎出。

五老兵馬九億萬騎出。
九老兵馬九億萬騎出。
太上兵馬九億萬騎出。
无上羅網兵馬九億萬騎出。
无極都官僕射兵馬九億萬騎出。
无為羽林兵馬九億萬騎出。
无上熊羆督賊兵馬九億萬騎出。
无上三官僕射兵馬九億萬騎出。
无上刺姦僕射兵馬九億萬騎出。
无上勇平兵馬九億萬騎出。
无為交職兵馬九億萬騎出。
无為王方兵馬九億萬騎出。
元靈兵馬九億萬騎出。
无為正平兵馬九億萬騎出。
无上至平兵馬九億萬騎出。
无上順平兵馬九億萬騎出。
无上都平兵馬九億萬騎出。
无上金剛騎九億萬騎出。
清微天兵馬九億萬騎出。
太赤天兵馬九億萬騎出。
禹餘天兵馬九億萬騎出。
梵寶天兵馬九億萬騎出。
鬱單无量天兵馬九億萬騎出。
化應聲天兵馬九億萬騎出。
上監天兵馬九億萬騎出。
禪善无量壽天兵馬九億萬騎出。
梵摩迦夷天兵馬九億萬騎出。
波梨答怛天兵馬九億萬騎出。
兜率天兵馬九億萬騎出。
不驕樂天兵馬九億萬騎出。
无上九天兵馬九億萬騎出。
无上破敵兵馬九億萬騎出。
无上伐逆兵馬九億萬騎出。
无上刑神兵馬九億萬騎出。

无上收神兵馬九億萬騎出。
无上八威兵馬九億萬騎出。
无上三五交戰收神兵馬九億萬騎出。
无上天丁力士九億萬騎出。
无上天部甲卒九億萬騎出。
无上雷公霹靂九億萬騎出。
无上風伯雨師九億萬騎出。
无上前部驅除大將九億萬騎出。
无上後部大將兵馬九億萬騎出。
无上虎賁中郎將九億萬騎出。
无上黃鉞將九億萬騎出。
无上平天將九億萬騎出。
无上刑神將九億萬騎出。
元上輝神將九億萬騎出。
无上攝糺將九億萬騎出。
无上依公將九億萬騎出。
无上九天將九億萬騎出。
无上帶甲將兵馬九億萬騎出。
无上破狄將九億萬騎出。
玉清都曆將九億萬騎出。
无上三天將九億萬騎出。
无上八威將九億萬騎出。
无上羽林將九億萬騎出。
无上羅網將九億萬騎出。
无上都官將九億萬騎出。
无上幡天將九億萬騎出。
无上直齋三十六部都尉，九億萬騎出。
太清三十六部真君兵馬，九億萬騎出。
无上三十六部司殺大將，九億萬騎出。
无上三十六部直齋校尉，九億萬騎出。
无上東九夷君大將兵馬，九億萬騎出。
无上南八蠻君大將，九億萬騎出。
无上西六戎君大將，九億萬騎出。
无上北五狄君大將，九億萬騎出。

无上中央三秦君大將，九億萬騎出。

无上遼高大將，九億萬騎出。

无上四十九天王大將，九億萬騎出。

无上玉清大將，九億萬騎出。

无上大帝直齋大將，九億萬騎出。

无上玉晨大將，九億萬騎出。

无上三皇大將，九億萬騎出。

无上天帝大將，九億萬騎出。

无上臨察大將，九億萬騎出。

无上玉清二十四太上帝大將，九億萬騎出。

无上混沌根源本始天上地下，三十六千萬方位諸官、鄉亭里域真官出。

无上直齋百僚官屬，揮神洞玉羽章，三皇五嶽太一，千乘萬騎，羅列鹵簿，屯軍住臣妾等前後，直齋功曹住立四方，直齋使者住立中央，直齋羽衣使者、仙童玉女、幹佐小吏，黃裳羽服，冠帶垂纓，擎持玉椀，住立臣前，銜受口中辭語。此間某州郡鄉亭里域四面真官，注炁監察使者，召直齋監功大將軍，前部效功後部效殺直齋使者，无上三十六部都尉，太情三十六部真君，建節三十六部大將軍，建節三十六部使者，三十六部虎賁中郎將，三十六部前後僕射合干六部伐逆。大將，三十六部伐姦逆刺，三十六部收神大將，三十六部斬鬼大將，周天八極周天君，天上地下億千萬重諸官君，天皇執法吏，執法天皇吏，十方安國君，十方安樂君，十方勸善君，十方化惡君，十方伐逆君吏兵士，東九夷君，南八蠻君，西六戎君，北五狄君，中央三秦君、天上地下三百六十契令諸官君，臣等所佩揮神洞玉羽章，百僚謁者使者諸官君仙童玉女，擎持玉椀，騰臣等啟事，微君所訴，啟白丹誠之意，上詣无極太上至尊玉陛下玉几前。

泰玄都正一平炁係天師，太一无極金剛畢卷三洞法師，某嶽執明真人夫人，某官道士風揮神洞馴羽章，某治炁祭酒，臣妾某等頓首，死罪死罪，稽首再拜，上啟无極太上无為大道、无上玄天皇太上帝、玄妙父母、玉晨大道太上玉皇至尊玉几前。臣妾等以小醜賤生，虫芥之餘，謬生矢地，得見光明，為天所覆，為地所載，四時所養，五行所長，星辰所衛，日月所照，至於今日，千椿一會，得稟元炁，參預仙流，銜真握契，覩見上玄神仙妙術，不以穢質，少好生道，棲跡山林，斷穀服餌，經諸峰岳，吐納雲霞，玄思未降，不得其益，三尸不滅，赤子散亂，神枯形悴，八達不開，未得聰明智慧，才无分表可以酬時，宣教无方，愆多功少，上負玄都，承驕恃慢，實有萬沒。但太陽多恩，育仁无惡，天老好生，蕩蕩泗汰，思前補過，得至今日。臣妾某等頓首，死罪死罪

，謹以謝聞。臣妾某等謬享大法，乘涉無為，仰瞻上聖無極天尊，仰願百國安樂，萬姓齊生，受道之日，三官有約，助時理炁，都督人鬼，攝彈萬靈，誅邪伐逆，建立福田，非道不行，非道不真，非道不清，非道不濟，非道不生，救活百姓子，安國以樂民。但臣妾某等謹按文書，同義某州郡縣鄉里民，男女生祭酒某甲等，奉法多違，未貫大化，收愆被考疾厄云，今日抱病困篤，或經年著牀，或官擊事云，大小王甲深慮一旦不免長夜，迎臣妾等對家所，求請仰謝七玄之根，生死罪責，亡九世祖某，至亡父某等若干人，賚信叅辭如別一諸者二伏讀如按。王甲家先亡後死，平素之時，仕宦為業，籍得傳基，或為帝王公侯、州牧刺史二千石、郡守令長丞尉，或為漢魏臣吏，用法失忠，或承矯凌弱，枉剋無辜，或上不敬天地，下不畏鬼神，自作一法，不順道教，為上不恭，或為下不敬，為父不慈，或為子不孝，為夫不和，為婦不遜，或內外媼亂，捨正逐邪，廢嫡立庶，破國危邦，或幸婢愛妾，室家義絕，刑危教言，更相呪咀，兄弟不和，骨肉相害，或爭錢財奴婢田宅，更相揶揄，披頭散髮，觸悞北君，被刑收考，殃逮後生，亡者魂神，考責在天牢地獄，太山二十四獄，不堪苦愴，還引生人，求以補代，致後世嬰災。臣妾等今為王甲清齋，仰謝某亡九祖父，下及某亡父甲如干某人，生時有如此眾過，無狀之罪，下流及生者身，懸文在二十八宿、三十六天府、九官玄曹，事結積年，未蒙散釋，願今直齋百僚千乘萬騎，攝太山府君二十四丞獄吏，檢問王甲亡父如干某人，事由何曹，何事死亡，問連逮何府，問為犯何神，問為以九世，問為以八世，問為以七世，問為以六世，問為以五世，問為以四世，問為以祖父母，問為以某父母，問為是兄弟，問為是中外姑姨伯叔，問以甲今身愆過，問為觸何神，問為犯何鬼。一切辟考，此間里域真官注炁，木下房廟壇社、山川五嶽八神，獨按都侯，鈴下功曹，主簿河侯，橋梁水之神，河伯水帝水丞水府，恐甲等肉人，不悟所犯，或比已歸首，未蒙恩福，恐或是血食之鬼，其不放遣閉，繫甲家大小三魂七魄，女子十四魂，致嬰疾者著牀，或經涉年歲，或遭罹幽厄，性命莫測。若以無辜，故炁貪食之神，橫相賊害，不畏玄都明威之制者。臣妾等齋官百僚，太一三皇揮神洞章，無上三十六部都尉，無上三十六部威天大將軍，羽林虎賁三十六部中郎大將，金剛三十六部力士，九億萬騎九億萬兵，各佩鏡甲，以次收治大鬼，送付天一北獄，小鬼即斬。若是甲家先亡後死，考責不解者，願以真正之炁，隨願解脫械節，放赦魂神。若以甲身愆過所收，於今釋散，直齋百僚為甲家明燈火於九天之上，九地之下，二十八宿隨事考正，毀天曹簡書，絕地官文墨，齋竟之後，霍然請除，則荷大道白骨更生之恩，仰願威靈使百國從容朝夷，鮮卑各保境域，時節苗稼，年年豐熟，天下太平，人民安樂，臣家國君陛下，上宰公王，下及兆庶，一切眾生，四海五嶽學仙道士，咸蒙

昇度，天下男女生官祭酒，過度厄世陽九百六，真得侍聖君。臣等今執法大化，涉山跨壠，岩穴為居，或蹙出民間，宣考醫治，建功上府。或遭凶惡毀慢三寶，或有害心，或違天負義，願為改更開悟，得見上真，惡心自更，建立福田，聰明智慧。臣妾等三曾五祖，七世父母，咸蒙昇度，萬姓翹首，得如所願。上請監齋百僚，一時來下，監齋直事，典香主童，典香玉女，小吏使者，百僚官屬，悉賚臣妾等所訴，乞垂原赦王甲家千罪萬過，千欺萬責，從今以去，福生十方，禍沒九陰，謹以啟聞，旋行禮拜，仰謝天尊，臣妾某等誠惶誠恐，稽首再拜以聞。

臣妾某姓某，屬州郡縣，无極太上无為大道玉陛至尊玉几前。

太歲某年某郡縣鄉里中啟。

右出官啟事，似章表之體，真人所傳，慎勿改易。至於其中疾厄緩急，隨源陳諮，簡要去繁也。

出官竟，仍行香禮懺，一依中下元。行道畢，復如常，然後復爐出。

主人辭，貴賤不同，道士之身，民生又異，隨宜制之，大體如左：

辭前條九世祖以下，至今近亡者，疾夭傷死年月日時，葬送處所，知與不知，一二狀言，連辭於後。某唐虞夏殷，隨代言之皇帝王、皇太子；某晉楚齊秦，隨封言之公侯伯子男；某家宰司徒，隨位言之；某州郡縣牧伯刺史、太守內史、令長相尉細位，亦隨時言。三洞法師某嶽先生、某治祭酒、某道士如干錄、某州郡鄉里奉道男女民，非天子皇后，直云男女民，不須奉道。守生弟子，三景三洞之神、洞玄洞真清信、三寶十轉，隨所受言之臣妾。某男受治，若不受治而受經、或不受經而奉郊祀，皆稱臣；女位等男，皆稱妾。妾妻差降，姓氏不同，科在傳授儀中。年如干歲，今治，自官長以下，云位亦居君，某州郡縣鄉里、某宮第府廡館舍，稽首乞恩。辭初有天下者，云某樹因曠劫，荷慶今辰，古世以來，崇奉大道。事俗云先緣罪障，承事俗神。事佛云籍以宿因，世奉佛法。无所事，云結業昏蔽，不識神明，累世一身，未有崇奉。事周孔，云世襲仁義，仰慕先王，師宗周孔，祭禮歸誠，謬荷玄祐，榮顯超昇，憑心妙化，庇命法門。已傳世帝者，云仰荷玄恩，享福隆泰，亡祖某皇帝某，亡父某皇帝某，本官學代耕，出處隨運，爵祿相係，天祚奄鍾，稍革純冠，遂流玉搢，榮慶超極，感佩唯深，但洪業始興，奄捐萬國，太平未遂，嗣德在今，而某思不協幾，鑒非玄燭，億宇難綏，百靈易黷，直言寂抗，補袞闕聞，夏姦屢萌，夷凶每蠹，二儀違和，七曜乖度，水旱不適，疾疫薦臻，家國多妖，喪疹相仍，亡祖某皇帝，元功自援，寡德期全，念此憂遑，甚履陽火，過蒙景福，榮爵相仍，值某唐火、虞土、夏金、商水、周木，隨代言之，精數極某，依五次言之，德運興者，鴻輝猥集，大福所鍾。揖讓者云某皇帝某，審歷爰歸

，推祚禪位，高讓天下，允執委臣，臣德輻驚惕屏營，頻煩辭避，遂不見從。干戈者云某皇帝某，幸籍先慶，叨居宸極，倒亂五常，毒流四海，某酷某暴事云云，凶據豺虎，罪甚匹夫，某恭行天罰，醜類即夷。獄訟者云某謳歌，歸某神器，彼寄不可久違，以某年月日時，應天順民，告郊登受，躬臨四海，親率萬邦。皇太子云某以輶薄，忝居儲宮，生長五濁之中，動靜三灾之世，愆疊易積，功德難弘，攝生寡方，常多不念。抱病者云某月日時，起覺患某，痛毒經旬，救治祈請，內外備至，未蒙痊除，先身今生，深罪所致，久无感效，憂慮增危，年命厄會，殃考所延；或受法不修，違經破戒，欺罔幽顯，謫罰所鍾；或奉神不精，事道不專，雜信魔俗，邪氣相纏；或爭事俗神，烹宰殺害，鼓舞妖訛，罪疊重沓，故氣纏滯，夢想交通；或生无所信，不敬神明，侮弄人鬼，輕恣嬰灾；或先世祖考，建創皇基，禪受乖正，誅戮違經，賞罰多濫，結怨生殃，及改易宮廟，造立山陵，開拓城邑，修繕田園，起架臺榭，穿鑿山池，壅遏泉源，斷絕道逕，移徙古塚，棄擲尸骸，犯天地大禁，觸神明眾忌；或棄遠聖賢，親近愚佞，委任內外，多非其才，弄勢乘權，凌侮一切；或宵遊夜飲，龍魚不分，所行暴虐，肆惡不悛；或謬妄不覺，或覺而不迴，或迴而重作，反覆无常，苦酷百姓，侵辱萬靈，破壞宮觀，毀廢精廬，盜三寶財，假十方號，換易陰陽，混亂男女，淫通烝蟲，凌略清貞，日月稍深，咎禍積結，難可解釋，命在漏間，兼比夢寐紛醜，先亡相參，妖灾怪異，不可具陳。或某月日時，聞見某事，或某月日夜，夢見某物，准之前後，唯凶无吉，自非大道，期濟莫因。謹至心投命，憑仰玄真，緝熙百靈，矜恤億兆。若皇后妃嬪、夫人公主、諸王皇子、帝族侯伯，云伉儷宸極，參侍帝宮，誕生皇家，宗連帝室，幸藉餘慶，冠冕相承；或出莅方嶽，入參機衡；或文司武職，厚爵高官；或帶州郡縣尉丞郎，開國剖符，耀麾仗節，侍衛左右，主領要辟；或到法所委，扶救匡弼，諫諍直言，典攝顧問，管記謀略，廟筭帷籌；或卑劇邊遠，積戍頻羈，水徭陸役，使命殊方，往反艱辛，偵候危險；或祿重榮深，才不周務；或出自卑微，叨居寵任，內外讒嫉，呪咀妄生；或智不效官，行不毗國，撫接哀怨，誹謗橫興，朝野无援，孤介憂危，夙夜自彊，思弘不息，而百王餘弊，萬品難齊，新故多怨，遠近吁嗟；或陰有仇恨，忿恚肆凶，邪情俗意，要結鬼神，彊祥魔醜，黨扇為灾，伺候間隙，禍在不測；或存亡罪疊，日月漸深；或傍人所誤，或自作剋身，或尊上逼迫，造諸惡根，或苦使他人，生眾凶毒，君親知識，不相匡諫，師徒朋友，不戒視成，更相連染，灾害方臻；或頻營首謝，齋章相仍，未蒙感效，良由罪深，未閑妙術，期濟莫因，寶位既重，懼不克堪，俯仰兢戰，若履冰谷，若尊卑有患，各隨源銘之，日月迅流，便積旬朔。或即位以來，已經某年某月，治化多蹇，世道未康；或无命之帝，稱兵某

州，自號之王，搔擾某郡；或犬盜鼠竊，遊魂山川，討捕未擒，累月俺時，某將征伐，沒陣敗績，土地侵削，家國日蹙；或所使某人，委道反逆，權彊輔弼，稍生異心，斷截逼迫，勅詔不行，帝族皇宗，漸見黜罷，中表近親，枉法被刑，左右侍衛，皆致誅戮，酷虐將兆，大亂方成，无愆嬰廢，因弱淪傾，良由宿罪，值此凶辰，將絕之祚，特乞申延，已盡之筭，重加增益。或自某年月日，不雨至今，百川乾竭，萬物焦枯；或某時雨起，霖澍未晴，積旬累月，逾稔經年，日月相犯，星宿相侵，山崩地陷，霧炁連綿，雨血隕星，前後非一；或積雪凝冰，大風折木，邪人鬼語，童謠炫時，奇服異裝，表現灾禍，橫尸盈路，水火屢延，朝野饜瀆，遠近憂昏，飢饉流移，盜竊充斥；或公卿失禮，蒸庶无法，欺罔人神，鬪亂內外；或學侶妖訛，妄生詭異，荒險月劇，訓導无方，雅頌久寂，獄訴繁興，叛道入邪，攻伐三尊；或竊取經書，貪為師主；或假道作妖，謀圖不軌，幻術感眾，雜揉真經，改易前後，空中妄造，乖理失宗，苟以為是，託真傳行，多取信；或修而不受，授而不精；或抑絕賢明，附從愚瞽；或斬固有志，彊昵无懷，為邪所惱，不知自訟，緣途吐怨，詰責神明，所學无驗，所作不成，嘖嘖自用，非貶仙真；或所受符籙，三洞寶經，神仙祕文，玉字龍文，某篇某部，策傳真圖，經荒履亂，遭值劫賊，寇盜水火，行來遺亡，去失蕩盡；或失某等，幽司刻謫，流遷逮今，已得受某，某等未受，雖懷憂懼，善事難諧，頻被考罰，轆軻備嬰。今某甲子乙丑，隨值言之年，肇建，四字悠長，或陰陽代序，新故交謝，或吉節兼并，又是本命生日，不勝感慶之情，炁候未適，疫毒方行，疾患者云風勞虛熱，或素苦玲癢，或某年月日散動，發癰差劇，進退依源言；或夢見前代，諸帝傷亡，君臣訟訴稱怨，攻擊不已；或邪精群魅，假託他名，妄作怨家，願為讎敵；或髣髴現形，生諸驚怪。當云開闢以來，五德更生，往御今天，終始无極，明主代興，不惟揆此自然之大，度是神聖之常宜，但行化合道，則卜世克長，布政乖理，則鼎遷期促，兩善共時，運充揖讓，一惡徧肆，數動干戈，某帝殘忍酷毒，簡在帝心，內外離絕，自致滅亡。某或亡祖某、亡父某，歷官盡忠，處所立績，靈祇賞義，人物感恩，某等戮彼无道，逼見歸崇，或與某等共行明罰，克定禍亂，命之所臻，諸所廢除，出不獲已。既傾天還樞，地更軸，幽顯方協，禎祥宜隆，而夢想妖異，邪魅形聲，當由嫉鬼妬神，妄懷干試，自非大道，消之莫因。若是魔怨，急速降伏，若是真爽，亦宜即迴，以怨報怨，怨惡彌甚，以德報怨，萬福乃興。且古之至人，不念舊惡，今之神鬼，寧懷昔怨。願天誘報惡，仇恨僉祛，紛訟解釋，存亡同懽；或年命厄會，應見凶灾，神威接救，臨危必濟，冥福自授，懼不保全。若有公私憂危，怪夢驚奔，移動去失，結願@齋，隨人多少；或某年月日某事，因某道士處，於某處啟願，蒙恩果遂，解了先言

；或所願雖為不諧，蒙至今辰，思愆敢怨，昔已發心，不敢逋負，今設齋供，乞丐後恩。若有喪，云亡祖某皇帝某，亡父某皇帝某，亡伯叔、兄弟、子姪某王某，亡姑姊妹某公主某，大臣某位，某年月日時，崩薨喪逝，銜哀悔咎，无所逮及，神輝无反，劍舄有歸，世多憂虞，俛從權制，某年月日時，開建山陵，某月日時，卜定永畢，追號永慕，日深日酷，未知亡某魂神之適何道，今三七虞祥周忌之日，不勝增感之至，憑道乞恩。伏聞大道妙法，自然清齋，功重福探，濟度无量，謹伏齋值，奉辭以聞。伏願法師、道士行道，請福乞恩，懺悔首謝，乞原恕凡庸不及之愆，蕩汰新故積殃之禍，拔度九玄父母，七廟之靈，亡某等中外眷屬，公侯五廟，今大夫以下无廟，并得云七祖父母、一切先亡，同離地獄，俱登天堂，受鍊更生，業昇漏盡，與道齊真，利祐現在，使陵，非天豕皆云墳墓安穩，殃注斷絕，宮第，庶姓普云宅舍請福，灾害不兆，兵戎靜息，上下和睦。上願太上皇某、皇太后某，御膳萬福，六宮咸康，大小王公、中外妃主、朝野遠近，皆蒙安寧，二儀交泰，七曜調明，四海靜波，九谷豐盈，夷虜弭伏，敵國歸降，冤家債主，迴相和親。或某州某人，作逆速催，姦賊時滅，寇盜永除，文倫軌一，六合清和，兆民懽樂，天下太平，无極世界，種種眾生，已生未生，咸得成就，免度憂苦，解脫逍遙，某經春涉夏，履歷秋冬，常保貞吉，所苦速差。或願某事必蒙諧果，憂患消除，威風隆盛，智慧洞達，天祚延長，十方善神，保身護命，三界官屬，納吉禳凶，使人神協祐，體相金剛，久壽必驗，與善有徵。公王以下，皆不得言天祚，可言福，公侯以下，悉云年壽。又宜云奉上接下，內外懽心，誹謗不起，爵祿超昇，學業成就，功行光隆，行來出入，四道開通，規圖果願，所向從心，長少進退，財產滋張，工術明驗，子嗣繁昌，道化日新，一切荷賴，蒙如所請，仰荷大道罔極之恩，謹辭。

太歲某月日。

奉受經戒者辭，用師資行事本，自天子至于庶人，依擬消息之。己身自表玄受經圖，辭體如行事法，其中損益，隨而言之。凡為人自為傳授，奏聞用前，大出官皆依後，立成如左：

向北鳴鼓三十六通。

臣妾姓名，身中四支五體、三十九戶上真靈官，左右飛仙玉虛侍郎、五帝五色元皇太真、飛龍功曹、神仙使者，各三十六人出。玉虛侍郎執飛仙羽節、九色耀天之麾；五帝五色元皇太真，手執五帝命魔靈幡；飛龍功曹，冠帶羽衣金真鳳章；神仙使者交絡七元，擎持玉椽，對立臣妾等前，銜受口中秘言，乘金根紫蓋，丹轅瓊輿，飛雲之論，從金仙玉童、太華玉女各十二人，左右龍虎騰天羽騎，各二十四萬眾，齊出嚴莊。帝席宮鳳衣玉童玉女，中元宮玄元玉童

、紫衣玉女，綱神宮鳳衣玉童、誘衣玉女，各九人出。上尊宮朱衣玉童、羽衣玉女，真元宮錦衣玉童、鳳衣玉女，紀明宮丹錦衣玉童玉女，各九人出。太上宮羽衣玉童、錦衣玉女，紐幽宮雲錦衣玉童、丹錦衣玉女，關會官飛錦衣玉童、羅衣玉女，各九人出。无為左右功曹、揮神太初功曹、太極功曹、高上玉童玉女，各十二人出。无上僕射太玄使者，各十二人出。揮神兵馬三十六部都尉，各九億萬騎出。三界內外土地真官，并顯服必羅列，住左右前後，停虛立空，各當所職。玉童玉女，通真使者，飛行紫虛，上登九天峻嶒瓊房金輝玉殿紫蘭之內，上啟无極无窮至上洞真九玄元父、太虛玄母、元始天王、高上玉虛三十九帝、二十四真、高聖玉晨太上大道君、四司五帝无極天尊，悉係自然玄都元皇，大洞三景弟子小兆真人，臣妾因緣有幸，得生法門，或生值玄化，叨質高上九天寶經，好道樂真，願獲神仙，啟玄告誓，密習修行，法當開度同志賢人。今有男女道士姓名，叅辭執信，求受洞真，投誠慊款，久彌堅推之玄科，不容抑閉。謹尋青宮上經三百卷、寶訣三千條，下仙小學非所宜叅，上仙真聖錄字青宮，隨緣稍得。獲者希龜山烏母，西域總真，代代出化，或少或多，獨立偶官，隱顯各異。按某所受，因緣未備，次第舛互，首軸乖離，文字訛謬，旨訣叅差，即年累紀，修行無驗，亦由宿植尚微，今功未重，雖受名目，未覩文圖，或得文圖，而无要訣，或諮詢无所，或告玄未通，既未能專，又不能博，徒損日月，期效寂端，夙夜憂慙，追慮增咎。今求更受，治寫本文，隨次遵行，永為身寶，心言旦旦，理在可矜。臣妾以凡下，質乖高上，誤以蚍蜉之識，叨攬龍鳳之章，忝藉餘慶之榮，陶染大乘之法，錄傳玄授，遇師曲躬叩，前後所得內外要文，真言妙旨，不死之方，神符寶圖，長生之術，篇部筌蹄，古今略備。□□兼濟無窮，欣荷无量，但事重身輕，已歷某紀，□□年造知命，□□業行未超，沉淪濁世，與俗不殊，空翫尊經，未能出類，常恐老及，慄愧屏營，宣泄之禁既嚴，杜絕之罪又重，俯仰驚惶，甚履冰谷。臣妾與某同值季運，玄化凌夷，公私屯窘，有志未申，俱慕至真，共嬰宿障，雖立誓无退，而昇進靡階，睇景灼心，實忘寢食，過蒙玄恩，得見今辰，方罄丹衷，庶遂本願。臣妾既緣會先獲寶文，乃慙精懃，諒不敢懈，某今厲操，不怠不休，冀果靈降，感通必明。某繕寫洞真十有三秩，正部一百二十五卷，別部三秩，又二十五卷，文字粗畢，叅校未周，符圖名諱，尚未曉究，日月易流，福業難進，仰希良辰，啟告皇極，乞隨意奉行，餘者續就。伏願玄上大慈垂哀，班下所由，勅勒三界四司五帝內外真官，與紫殿青宮侍經典圖直符直事神童玉女，土地歲月日時靈祇，一切善神，同賜鑒照，衛護臣妾及某，為解釋先世今世、先身今身，宿新愆愆，悉皆蕩除，原罪降福，布正禳邪，消凶納吉，却死來生，生悉真神入某身中，使眾魔不敢干，諸灾不得犯，令修習宿驗，通真

達靈，洞了一切，逆知是非，度身濟物，功德巍巍。臣妾无妄，傳之尤□□某，免負違之咎，同昇帝庭。□□如今所請，謹共清嚴，以某月日於某處，依上元法，對齋啟聞，朝禮事竟，今拜朱表一通，請九天高上領仙侍郎、監靈大夫、飛龍騎吏，印寫所奏狀言如素，逕御无極玉虛上帝几前。臣妾謹讀表文，某伏地恭對。

如法表前條信，次辭，次經目，都授者不須目，仍次表也。

表用八靈本，讀畢，操文如左：

臣重勅身中四肢五體上靈真官、飛龍功曹、神仙使者，各十二人操，臣謹為男女道士姓名，拜上授度洞真經部一百二十五卷朱表一通，逕詣无極玉虛上帝几前，隨表進對，分別朱紫。若文字脫誤，言辭顛倒，即為正定，如炁上昇，无令上官有所譴却，當使所請時諧，所願即果。若有強魔妄來干御，九天騎吏登收攝治罪。臣妾閉炁按下，伏須報應。操竟，仍北向經按上執經，弟子於左，□□擎□□法信，師叩齒三十六下，存太上玉皇，令日月之光，使照經師徒之身，呪曰：

太微何眇邈，真人結虛生，空津自然道，集為大洞經，真賢奉法信，乘運歷黃庭，太山削死籍，司命書仙名，保祕年劫積，泄慢地獄嬰，考及七世祖，風刀解汝形。畢，弟子三拜受經。

經目在科，付總經下者，齋朝醮儀，趣一則足。付經竟，復官法如左：

臣拜表授經叩，事竟，向所出臣身四肢五體上靈真官、左右飛仙、玉虛侍郎、五帝官屬，一切神明，各還臣妾身中，從眾妙之門而入，在左還左，在右還右，飛龍功曹主相領押，各復宮府，无令差互，備衛臣妾身，永无越逸，須後召奉行，一如故事。

復官畢，復爐如常。

復爐畢，詠出如常。

出後，閉室殿壇如常。

師施散信物如常。

弟子三日謝恩如常。

同學修齋法信訣第十七

凡有同學遇灾，被厄疾病，官口飛橫之害，皆同得修中元之法。當齎香油為信，告齋主，隨其情事，列奏高虛也。

同學者，同師也。師玄師者，同習上法，即同學也。凡此之流，未成真聖，皆有灾否，宜立齋，所請為客，自營為主，主人施散，以廣功德。貧富墨堪，不可乖法，法使稱心，不限多少，豐者不奢，儉者不陋，內外形神，无有悔吝。如此冥會，享福无央也。

應齋旨訣第十八

凡學法亦齋，合丹亦齋，入山亦齋，傳經亦齋，八節亦齋，甲子庚申、太歲之日、本命亦齋，富貴亦齋，貧窮亦齋，有樂亦齋，有憂亦齋，疾病亦齋，官口亦齋，有厄亦齋，有灾禍亦齋，國不寧亦齋，師有憂亦齋，師有厄亦齋，因盟有憂亦齋，諸如此等，其功至重。若能常修此法，三年克得真人下降。但依常修行，九年感靈，能乘空飛行。其道祕重，慎勿妄宣。

凡受經之後，修齋為急，救物濟身，唯此為務。若自為人剋日已建，忽有非意，皆是罪深，人鬼相惱，破壞善事，不得怨懟。但堅正心，小則奉道懺悔愆，啟告洗誠，以祈玄祐；大則啟告，解齋散座，須灾厄度，別更建之，其間存思，悔咎乞恩，念念不絕，必荷哀原。建之无礙，永永勿休，日日精進，得道有期也。

登齋法訣第十九

登齋之日，當選高稱，通靈釋微，才智慧朗之人，高座講說法義，次者和之。同齋皆靜座閑聽，伏度法化，不得慢略，外形託齋，內懷異念，虧忽天格，為司空所紮，罰以五帝神兵，移名北酆，不得又登齋堂。

登齋之日，男女之人，當以學業深淺次之，容與雅步，旋香禮願，每令如法，坐起臥息，不得混雜，更相調戲，无有尊卑，為諸天所謫，鬼神所慢。犯者司官所紮，罰以五帝神兵，移名北酆，不得又登齋堂。

凡同學德高年大，受法多而久者，常為法師。若受多年大，不閑法事，勿為齋主。若明解高德羸老，不堪為主，猶為座首，次者行事。少而有才德，眾所推者，可為法師，慎勿爭尚。犯者滅身。眾雖不及於己，而不肯推之，推之不愜，或偽相讓，皆宜急避，託疾事辭，全身遠害。不可冒干。冒干致灾，彼此陷禍矣。明各慎之。

三元名品，其數不同，上九、中六、下三日也。若長齋，一月之中，歷修三元，皆營其已，上旬上元，思神合藥，中旬中元，解身所犯，下旬下元，拔度七祖。能行九真明科，贖先世及己身九條罪者，可修三年之齋，用三无啟謝，營九條之法，遵三无之事。千餘日中，不可不存神，存神不可不合藥，不可不解己所犯，解己所犯不可不拔度先人。不拔度先人，則己罪不釋，己罪不釋，則合藥不成，成不可服，服更致凶。致凶之藥，亂於存神，既亂无道可冀。是以為上學者，急建三元，三元相須，如油主火，偏則不明，无以延照，志士悟此，仙真必成矣。

受齋儀盟信訣第二十

玄都上宮真人，皆以月上旬修上元，中旬修中元，下旬修下元，況於世學，而不知修三元之道，空思玄微，真豈為降，徒勞勤事，求仙遠也。若有志心

，當依盟齋糴紋之繒三十尺，金環九雙，詣師告誓，啟度真文，修之九年，克得飛行，上登玉清之宮。輕泄寶文，七祖充責，己身亡命，不得又仙。上學之人，得經便齋，齋有科儀，法別請受。若師與都表，則停偏有所參，宜的辨信，依按此文，詣師啟度，對齋書治，表奏如上，不可妄行，求福得罪矣。

上學受科，必緣明師，視之如親資，尊師如父。上聖真仙，皆號師為師父，女師稱師母，師之師即祖師，師祖師師即曾師。高遠極道，道應無窮，故不事存也。而三炁輪迴，終是一炁，三師之尊，亦同一尊，引常行事，皆存一師，是所授經師也。若非常之請，皆存三師，師有隱淪，不出姓諱，或師玄師，皆不得存。若已自師玄師，則存二童而已。存師諦心，精思慊到，久久見之，了然相對。雖是凡師，神人代降，必授口訣，速得成真。慎勿謾昧，忽略忽忽，不能感通，更致魔試也。

行齋法訣第二十一

凡行妙化，當立館宇山世，華素豐儉隨時。弟子來學，師勿往教。道輕來學，又重善心束修，躬詣師門，通名拜謁，形神盡恭，請法受真，析恩救厄，皆辨齋具，諮師施行，不得猜疑，猶豫致考也。

凡天子王侯，至于庶人，富有堂室，內外精潔，男女不雜，清濁不參。行道之師，山林之士，因緣暫出，遇有善人，欲受經戒，可留其居，嚴加別淨堂壇也。若是世師，有佳壇堂，不得妄遊履歷餘處矣。

凡學士之家，尊卑內外，咸同受法，居止清淨，自有堂壇，與館治無異，如此延請師友，不拘常例也。凡有善心，大小不同，當相化喻，必令齊一。如其不迴，父子隔異，兄弟孫姪夫妻致殊，皆是愆深，前身罪障，非可如何。可得名從所好，公求作異，無相聽順，強則忿恨，憤激相加，罪更深重。微言不申，申之可密，密則相逃，逃避不使相德。不可竊盜財物，師知之不禁，同受風刀之考。不知乃無重罪，尚有不明之尤，退仙一階，亦不輕矣。

晝夜動止訣第二十二

凡受上法，飛行為高，出三界外，遊宴玉京，昇九玄上，應感諸方，如此之後，無累無憂。初學未能出界憂累，前後相仍，頓免既難，稍除實易，當思日損，損之又損之。晝夜無異，動止不同，晝動夜止，止逸動勞，勞逸二事，身神一焉，能存心神，念念不忘，晝動不勞，夜止不逸。不逸者勿貪久臥，申體放形，散鬼入夢寤驚紛，如此精昏，出入恍惚，施為謬誤，所作不成，急當思神，密呪誦經，疲則少息，微寐則起，起倦又息，踣側屈身，無縱五形，勿致久執，常能如此，不逸不勞。無勞者勿競，嗜欲之多，則求解上忤，下恣肆情，人神所弃，災患所藪，居安招危，在成致敗，急宜存道，守一尋玄，燒香讀誡，建齋行慈，救度一切，寡欲少私，輕財重義，崇習無為，為無

為，動不勞，不勞不逸，身神成一，一此身神，白日登晨也。

凡學無學，為無為，知子母，守雄雌，晝望日光，瞻雲逆順，夜候月采，察風去來，炁之暄涼，聲之宮商，境之興廢，時之否昌，去憂就樂，即吉避凶，不精於此者，乖上學之方矣。

洞真太上太霄琅書春之六竟

習學禁忌

晦半誦戒訣第二十三

夫學道須戒，如度水須舟，舟不可使穿漏，戒不可令遺忘。忘戒而行，善惡不覺，或以善為惡，止而不行，或以惡為善，行而不止。是以聖師傳訣在戒，諳憶分明，持之無犯，犯即知悟，悟即悔之，改往修來，全則入道。受經皆先受戒，戒或備在經中，或別卷軸，或口相傳，悉應誦之，心口通利。未能遍諳，諳其急者，文之多少，隨師所傳。初受之後，七日清齋，晝夜讀之，趣令上口。若闇滯好忘，二七、三七，一月、百日，必使分明。自此以後，一月再誦。月十五日，陰極將虧，月盡之日，陰滅方生，陰炁主惡，惡緣陰興，所以其夜，并加清嚴，獨及有信，人定登堂，燒香同靜，靜竟誦之，眾少則更誦，眾多則俱誦。誦法心口相知，不須高朗，先當禁斷，勿使竊聽，竊聽罪深，明宣告語。登高座者，初後皆禮，存如讀經，忌誤則重溫，流利則思行。行不全者，至心禮懺，首寫前後所犯所忘，慙愧悚怖，流涕道前，叩搏無數，良久乃止。

學有階品，戒有異殊，非同品者，不得俱誦，非同師者，亦不得俱誦。若共住止，當更遞誦之。凡公私行幸船車路間，遇晦及半，皆密誦之，雖有危急，亦不得忘，忘則罪探，存則福厚矣。凡正誦戒，為公私所驚，人鬼觸惱，皆即緘聲，分解隱避，不得怨言，諦存戒旨，彌加存心。過度驚恐，即更清嚴，結齋守靜，子午二時，懺悔首罪，散髮叩搏，各三千下，乞改前違，謹遵後順，卑禮三十二拜止。如此魔不干試，所向從心。脫復有逆，重依前儀，至誠款切，後必無復災驚也。諸有所見，或是道試，慎勿嗟惋向他論說，唯密懺悔，保吉無凶矣。

教學有穢無穢訣第二十四

受法違齋，成就無礙，乃得施行，依科傳付。若齋中災異，公私紛梗，皆當重齋，須吉遂事。三建有凶，不得復集，宜加懺謝，廣立善功，師與弟子，各精心行。或宿新罪愆，更相染誤，深自克責，勿尤神明，久無懺悔，禎祥必臻，感靈奉瑞，乃更營齋。授受依科，不得越略。受經之後，出入宿行，去還禮拜，啟告奉辭，吉凶善惡，動靜以聞。往來世境，化導俗問，臨省死病，救度血傷，至心立功。大法元穢，身雖履之，無妨朝禮，齋則沐浴，眾殮皆

消。未能立功，私行利己，觸犯凶穢，心神驚傷，損其志業，深宜自防。佻倖值遇，以術解之，解之法術，或章或齋，禁呪沐浴，各有其方。方中之要，唯在守靜，屏廢外事，清淨易衣，閒居別室，勿入齋堂，勿預法集，了已獨栖，存神內省，禮拜向北，歸命三尊，叩搏懺悔，晝夜不休，休息少時，仍復如初，日夜十過，二十三十，竭心盡力，自責興慙，媿无功德，未免穢綠，當誓持戒，研尋經文，如說修行，以卻諸淹。淹大則百日如此，小則四十五日，輕者三日，還復常也。炁力羸者，淨潔靜處，不必禮拜，直心存懺悔。體性彊者，不喪眾穢，神識通明，不假禮懺。

受經營十事訣第二十五

受經之身，應營十事。一者經箱，法用檉栢，在所或无，聽用桐梓，高六寸，廣九寸，長一尺三寸，厚四分，新淨完密，洗拭盛經。登涉須輕，竹笈可用，或并合眾經，須嚴淨如法，小大相容，不限度數。二者經案，局腳各五，亦七亦九，梓栢隨宜，腳亦可鐵，標馮釘鰲，漆素咸通，腳之小大，疏概令調，高應九寸，面廣一尺三寸，長二尺四寸，厚四分，以擎經箱。又檠香須一，法式皆同。三者經過，以竹為裘，黃繒裝之，大小取適，計容卷軸，不須廣長。裹及綠帶，亦用黃繒，无者糊紙，帶用紵麻，務存素淨，不假紛華。錦繡七寶，幸有作之，不可滯著，以為必是，是權教之末耳，慎勿經營苟為。四者經巾，大略須三，覆裹箱中，常應用一，出經案上，蓋覆須二，皆以玄黃，絳碧及紫，絹練挾裹，紋縵隨時，廣極其幅，長可五尺，直合縫之，亦可四緣，无煩綺結，珠玉莊嚴，鈴珮奢長，起彼盜心，遏惡之路，用開善之門，莫過簡素，幽顯俱通矣。五者經幌，常當有三，兩幅作之，如巾所用，行時須一，以幌經箱，齋時須一，以覆經箱，壞則易治，無致襪縷，周事而已，不得盈長，故敗火淨，勿雜用之，凡諸法物，皆依此例。六者經帳，皂絳為之，橫繞四方，周極其幅，幅下安緣，緣用襟綿，象乎宸蓋，不須垂裙，亦不假帶，无事金銀、寶飭奢麗，義同巾袂。材竹為竿，漆素適意，高下相稱，員斗隨人。七者高座，常宜有三，一以安經，一以轉讀，一以講議。材以椶楠，亦可檉栢，俱高五尺，其方亦然，亦可四尺，又加五寸，亦得六尺，高下相副，側咸隨時。染素无在華麗，若有妙畫之能，可摹存思之象，帳單及複，豐儉如前。八者香橙，高與座齊，長亦如之，廣數局腳，略與案同，釘鰲漆素，不限其制。九者香爐，奩合嚴淨，瓦木金銀銅鐵，隨時製宜。高座之前，各備其一，又自隨行止，常須一具，小大精麓，无定制側。香燈鑪奩，各依高座，高座蓆蓆，皆令厚淨，法師塵尾，都講經格，几巾壺籠，四周牀席，悉使素整，慎勿闕如，貧未能備，隨急先營。十者齋堂，法應南向，三間五間，隨所能辦，四面間架，巡繞得通，南北二戶，各有兩窗，東西二頭，窗又各一，關閉以時，不

得妄敞，一問之製，大較象茲。

家人同異訣第二十六

先天後天，必有相生，生生之妙，為道之珍，行乎萬善，合乎至真。父母妻子，兄弟內外，不得不知，更相勸勵，同學靈文，不俱時供養，得共各寫經戒，各勤修行，行之怠勤，各受報應，禍福之對，如影隨形。父子兄弟，不得相代，雖有延及，不如正分之深，各正性命，勿自惰而怙親知。親知相匡，己又能正，兩半相成，如眼與日。日不能令无目者見，猶親不能使不信者成，成成相須，故宜相受。

未有臺堂訣第二十七

未有齋堂，且住靜室，設橙敷經，小案檠香，於法應有，不得彊无，未辨頓足，稍就緝維。不可妄生僥倖，竊盜苟為，苦課積窮，與富爭競，又不可資業素豐，恫惜不營，於俗為富，於道為貧，此有重考，不可具陳。賢才君子，乘理而行，知法之急，急食與衣，衣食薄臧，此法則成，成法成俗，神明祐人，侍經眾真，內外威靈，消灾降福，必保長生。安樂入道，濟度无窮，人勿負道，道不負人。或有不利，魔邪相干，疾厄試難，前世餘殃，雖處危困，貞操彌堅，正意思道，无驚退心，凶自還吉，毀中獲全。勿疑不然，懷惑致敗，敗由迷惑，惑關不專，專篤之儔，乃知聖師之言，信而有徵。

三備一存訣第二十八

若遭荒履險，遠遊山川，或避灾救厄，出入孤危，諸物不可无經，必宜有心，有以證心，三寶常具，雖復諳練，猶須備三，三備一存，羣魔所敬萬有歸宗，在凶必吉。是以名山靈洞，莫不備存，人身冒涉，不能勝多，道德章句，五老赤書，神真寶訣，守一玄文，十數卷間，并囊佩帶，行臥抱之附於心上，脫有箱笈，荷之於肩，息則枕臥，小寬閣之，亦可懸於屋上，對頭首間，披尋開化，隨時屈伸，罪愆去失，悔責依科，未得道真，自所應須，得道之後，示物宜有，受之傳之，永无已矣。

受法後謝恩訣第二十九

重不可謂，功全在我，无關善親，常務獨達，不慕兼通，一失斯旨，雖智大迷。迷反能悟，勤相獎成，成人之美，內外所崇。道无不在，觸處可弘，未辦齋堂，法物尚闕，講習隨時，或牀或地，男女隱顯，貴知妙方，淨心秉卷，諮訣法師，法師申通，不假都講，或倚或坐，唯諦受持，問答詳審，不限多少。諳文句者，不須開經，禮請適意，无假香煙，不以事之忘神，寧以迹虧廢道。道之為教，法以制心，心亂營他，故使營法，法物檢心之要，非是道所必須。若能淡然虛寂，表裏无營，物感則應，動非我私，此會聖真，无待法物，自茲以下，因物制心，頓具既難，在辨勿怠。

四法六異序第三十

一切學人，皆願一切同解，解不可同，由一切根異，利鈍既殊，背向又僻，一心尚有前後離合，況乃天下一切人乎。一切過去，不復俟言，現在當來，宜加訓誘，祖彌君臣，賓友眷屬，中表遐邇，心事應符。治一國者，不得使正法乖異；共一家者，豈可致為道不同。請業營齋，更相獎勸，同與不同，其法有四。一者君父奉法，勅諸臣子，使之叅受，伏事師尊，不勅則請勿竊盜，為竊盜者，師不得授。二者上不事道，下願歸宗，皆應先啟，久乃遂心，三請不許，慎勿強為，強為要利，上下相蒙，互為佞媚，欺負人神，或形從而心不順，或口同而志永殊，或背向即違，或積久毀壞，爰至冒突，恥辱相加，頑暴凌犯，造吉成凶，不思正方，苟肆邪見，彼此罹殃，宿緣所致，今復不悟，墮苦彌深。三者志業各異，同而不和，苟相憤戾，共濟無期，自當遠避，不相驚觸，逃遁絕人，反經合道，密修妙方，各從所好。昔子晉之棄天下，遊乎伊洛之濱，叔申之違君父，登乎北常之山，比出乎不獲己，轉禍為福，或隱或顯，潛見取宜，彼此無傷，思相利益，開化尊卑，不致怨害，師以方便，匠成至心，漸染法教，前後隨人。四者休戚是同，善惡能共，而富貴繁昌，分居別宅，或貧賤流移，在世異迹，師縱不同，法猶宜一，一是何者乎，長生不死之道也。一切含生，皆願不死，不死之方，在於遣欲，遣欲何為乎，以其貪利剋物，損人害己也。能遣欲者，則不存私己，己無所私，則動靜濟物，濟物功深，自然得道，得道長生，要在功德，諸天上人，福樂有限，無功進德，求還世間，降神屈體，立諸功行，救度一切，除欲減私，服御吐納，二精五牙，金丹玄素，眾術億千，輔佐成功，隨緣施用，不可偏滯諸術，而功行無涓，空望長生，萬无一果。良由世人學法，多執偏術，見其序說，便謂為奇，修之無驗，又云虛妄。術本輔功，功在遣欲，欲不能遣，因術彌纏，自行此，必得成真，獨以為寶，不以教人，唯存濟物，我不能度物，耽著不悟，遂致死敗，不知罪招，反咎於術，傳習此迷，豈曰智慧。智慧之人，學而不曜，有功無滯，不自矜誇，成而弗居，未成不執，不執之為，為而不爭，利而不害，法地則天，日月同明，奉事可一，一其所奉，功德興隆，隆而不興，由於自然，然然無極，有精有麓，麓精交行，分迹有六。一者在世，二者出世，三者在家，四者出家，五者遊涉，六者幽居。幽居者畢志山水，往而無反，不屈王侯，高尚其事。遊涉者乍山乍水，或世或家，一朝一野，履歷無休，出處默語，隱顯隨時。出家者辭親遺愛，孤景獨棲，或在山林，或住里巷。在家者上事三尊，中接四友，下育一切，萬善備行。出世者餐霞餌炁，毀易身形，雲人羽客，神靈同遊。在世者婚宦子立，隨志所安，道術兼修，救度物我，泰則光贊，否則匡輔，進非貪榮，退不避難。皆宗太玄，同行道德，功迹有殊，成此六異。六異

不可，即同教化，須善方便，方便之權，易亂難行。難行易亂，何故行乎，眾生感至，不得行，遣貪婬，息憤恚，除邪愚，滅三毒，三毒滅亡，无復老病死苦，小智縛則致亂，大慧解則有功，且妙感自愚，易法竈感，值此難行，行之无到，更貽深害，詳慎抑揚，歸和為上，理雖難必，事有可量。量彼忌而不苟斷遏，遏而不能為灾，皆可令知，漸加開化，趣取兼濟，志在相全。損我益彼，乃是道行之常，損而无益，又法所不許，我利損彼，眾聖所戒，俱損无益，不可妄為。為无為，不防損也，而无不為，通利益也，一以此思，感要妙也。

洞真太上太霄琅書卷之七竟

洞真太上太霄琅書卷之八

講說修行

講議訣第三十一

文講議，思神行妙，然燈為常，續明无絕。未有齋堂，又无靜室，隨所身在，頭首安之，山林洞穴，舟渚无虧，虧則慙懼，心存謝愆，愆生阻障，志不得縱，首愆遣障，所願必諧。若庭止露宿，皎月通輝，是時息燈，不假有謝，謝在至心，不必皆形，形得稱心，心形俱到。束帶履板，因禮備科，此為上善，第一法輪。運有不泰，迹有叅差，服章雖虧，心不可替，幸得備有，慎勿強虧。得道神通，尚備率物，未得道者，豈可略之。雖是心解一方，未達眾方應用。若有矯激，激滯使通，暫時化彼，戒所不禁，禁偏許正，正是常科，偏擬非常，常則不用。用常之道，心為其主，未嘗可偏，偏在迹耳。邊非偏時，巾褐履板，單衣帖績完淨常具，貧者一通，富不過三，故弊相治，不得雜用。非可用者，潔處焚之，不得借人，又物猥施，施必同法，不可與他，他不識法，雜用傷科。法失懺悔，啟告師尊，受旨更作，依前文清淨相宜，各分別餘衣，慎莫混撓，妄置穢方。法事著時，所在危急，應須便旋，勢不暇脫。或无屏地，露處泄疵，皆以一手掩巾頭，心存雲黑為屋壁，慙愧有此患，首謝是罪，招願念化，為善利益，无所妨害。如此之後，法事憶之，猶應禮懺，然後復常。誤有穢污，悉濯香湯，漸煎事竟，懺悔慙惶，未得懺悔，勿著行道。行道之先，先當懺悔，請經寫校，迎送師尊，授受臨文，皆著法服經服。師與朋友通校，不得他人輕脫假借，交換易代，縱情盜取，或寫或校，欺罔人神，妄取妄與，並致風刀。校有誤處，咨師定之，不得率心，便自改易，己當受解，後定不論。看經審議，正危整心，不得驕慢，傲息茫漭，狡獪戲笑，引譬失倫，協談營私計則利。又不得虛解，沫刺竈過。若心勞思殆，有事宜營，去來休息，皆當禮拜。

出行入臥，先覆鎮經，披覽之時，執籍周正，部屬篇文，悉勿單露，笈案

分別无雜。外書之本，亦由黃老。老言禮於仲尼，黃設法於治世，昇玄化導，內外相關，大同小異。經誥各部，弗宜紛蹂，皆不可慢，敬之如神。筆硯紙墨，不可雜施，謬有觸犯，便即易除。經文漏誤，洗拭精潔，洗手浣巾，務存清淨，心疑不盡，勿妄執經。經紙剪易，即火燒之，別爐淨地，颺灰茂林，林藪若遠，斂沉水中，深池淨淵，亦埋潔地，勿致散漫，踐踏飛揚。師徒偏地，道宜共行，而所在貧窮，无諸信物，許以他准，无他效心，心效身勤，人神通感，啟告而授，後自立功，有物則散，无物則運心，心昇志款，伏事師宗，竭力勇猛，習學不休，才精識朗，智慧聰明，訓化輔師，功勝財物累人，生諸閻礙。捨之求通本无，无捨若无一，有一則非法須精。須以明信，取義准方，准方歸捨，捨之依義，義解鍊心，无疑礙道。道經无數，得之由心，心感未備，或片片相逢，高獲一卷，兩三之間，或十或百，千萬互遭，或前卑，或後尊，或先高後下，各各題目，部次參差。單行則不書第數，并出則第數羅陳，或有第无次，或有次无第，用信既殊，法訣亦異。異在支分，同在部合，合得積分，分獲疑合，皆是未達，更致罪殃，勿猜勿疑，必荷景福在身，能行眾善，思神易應，聖業速成。若知受而不存思，存思而不遵行，味味又不究竟，轉後不如在初。皆若受報登真未由，方當習業，更受經文，得多莫欣，獲少莫感、感則失專，欣則生逸，生逸失專，功業難進。大道淡然，勤行為上，常懼怠慢，何可空欣。注心修善，善理妙探，少未洞解，多豈能明，明解須專，專必有應，應則通神，何勞乎感，欣感兩遣，日夜專勤，誓進无退，號為道人，人行大道，號為道士。士者何也，理也事也，身心順理，唯道是從，從道為事，故稱道士。道士謙辭，於道未富，自言貧，亦云貧士。理未周足，足如未周，我獨若遺，故為貧士。士之為理，修善為事，事修无數，善豈可崖，崖无之善，隨時增長，大而分之，總領有十也。

十善十惡訣第三十二

十善既行，[十惡]#1自息，息惡行善，大慈德成。是以上品誠云：卹死度生，救疾治病，施惠窮困，割己濟物，奉侍師主，營建靜舍，書經校定，脩齋念道，退身讓義，不爭功名，宣化愚俗，諫諍解惡，道邊立井，植種菓林，教化童蒙，勸人作善，施為可法，動靜可觀，教制可軌，行常使然，十惡遍行，謂之道士。不修善功，徒勞山林，能信斯旨，勤尋諸戒。戒部甚多，隨緣所得，无數諸戒，无央科律，皆輔一神，攝於三業。三業者，口身心也。運動造作，善惡无量，无量善惡，十為惡端。一者妄言，二者綺語，三者兩舌，四者罵詈，此四口惡，反之則善；五者貪欲，六者竊盜，七者姦淫，此三屬身；八者嫉妬，九者恚瞋，十者邪疑，此三屬心。心業最重，為十惡根，斬絕惡根，修十善本。實言直語，通和講誦，廉讓捨財，內外貞潔，慶讚懼喜，敬信三

寶，備此十善，十惡永除。除惡成善，由於明師，師視弟子，皆如親兒，一切眾生，亦一子想。想念在心，心慈同愛，愛心無異，言迹有殊。子弟親表，書疏有差，他人歸道，義合為師。師秉謙退，不自居尊，與弟子書，及得言語，如敬他人，所稱君僕、門下、入室，接狎彌年，可吾可卿，可我可汝。師父及君，一切親屬，事之為師，皆稱弟子，亦應稱名弟子。子以學業雖高，因緣為師，不得自大，猶應稱名，尊彼如舊。唯出世之身，與在世親表，道法不同，禮拜有異。子弟親屬，共師父兄，父兄處之，依如本親，親屬兼同弟子，不得令如家人。眾術雜科，有不得父子親授，或禁以有服，或斷以同宗，各就他師，不關自然之法。自然之法，不必他師，十方如一，無隔親疏也。

為師度弟子去來訣第三十三

師尊相師，又有婚媾，姻婭雖通，師資如舊。假令師取弟子之女，師自修為婿之儀，弟子尊師如昔，接對不相受拜，來時逆請停拜，應出門迎師，師止其拜，師至座所欲拜，弟子重請止乃止。不出迎者，可立床前，待至而拜，止則交止，不得相違。唯法事各拜，不得相止，書疏拜訊不虧，吉凶制服依禮。弟子為婿，猶報弟子之敬，居父師友，敬之皆如籍師，雖結親，此親敬不改。先經交知，後為師匠，彼自尊敬，此交如初。男女相師，法略無異，但男弟子不得以女師為婦，女師不得以男弟子為夫，夫妻之後，乃得相師，相師之後，不得夫妻。夫妻在相師之前，相師在夫妻之後，猶得如初，別有絕夫妻之道。隨人所受而行，慎無譏疑，失正宗也。上士不絕夫妻，下士夫妻應絕，法出智慧經中。此謂在俗師資。

為師度弟子法：

受經之後，普弘宣化，有人樂法，津達度師。度師若過，歸乎籍師，〔籍師〕#2已昇，尋於經師，經師又去，諸三師同學，同學又無，付三師高足弟子，弟子又闕，就諸保證，保證復盡，憑託有道。道德可師，引人投命，餐化受旨，克成師資，計度九人，乃得自取，九人未充，勿妄為師，幽考甚深，宜加詳慎。

弟子去來保明法：

諸為弟子，於法有願，諮問今師，自陳樂受。今師所無，當語弟子，使造某人，依法叅受。或師實亦知，緣不得授，弟子之因，與彼應會，如此受他，無定格限，政宜先告本師，本師許去，乃得從心。或逃遁不啟，啟不被允，憤戾苟去，皆不得真。若師識彼師，為其告請，囑付成就，心無猜分。先不相識，弟子自能得緣，不可逼絕，致生怨愆。彼師精竅，訪其由來，其師尚存，不得輒受。輕薄迴或，浮學不專，共宜抑杜，不可開萌。若不與此人本師相識，當書信交通，詳其意故，審定源由，彼此無嫌，乃得傳授，有疑勿結，結

致深殃。如其本師已往，或遠隔異方，存亡莫測，至心可矜，宜取其手辭，時賢證保，三人五人、七人九人，連名表奏，啟告施行。其前師經戒、券錄科儀，存奉供養，无生慢心，不得毀棄，燒滅延災，後會前師，具自披疑，慎勿隱諱，欺負人神。若未經叅染，必无前師，手辭保奏，依法傳之。

新學出行別受三戒法第三十四

凡受戒未受經，受經未受戒，皆是伏勤門下，始學之流，不得離師父遊獨行。行則依賢，別受三戒，清齋詣賢，投辭三拜，奉手巾、刀子，受持如法，竟又三拜，師事此賢。不得自聚徒眾，輒為法師，當須師命，屬寄高明，高明未許，亦无輒然，動靜有關，去就聽旨。若經戒備受，乃得孤栖，聚徒乃立，隨意去留。三戒者，一勿忘二親，念起罔極；二勿忘三寶，存常奉贍；三勿妄四友，願受切磋。

師友昇過慶吊眾法第三十五

師友得道，九品昇登，皆共齋戒，慶賀獎勸，更相督厲，孜孜不休。若順運死亡，不顯異迹，亦共齋戒，祈玄請恩，精研戒行，修術長存。若出家絕世，山水為居，不須哭泣，專念思神。若在朝市，婚宦相承，傳國授家，依禮制服，師則三年，朋友替歲。同門業異，相為小功，異門志念，共事則總麻，哭泣吊間，間中營齋，自然大法，都无禁忌。行法之時，自應洗濯，沐浴易衣，便修功德，朔望吉節，止哭建齋，他日哀至，哭以對客，客去忍哀，停哭則盥浴，盥浴即登清齋，不必皆須沐髮。家中有喪，同師友法，法有內外，小異大同，書不盡言，觸類可長。喪禮差降，最為難詳，親疏貴賤，隨時而制，准古恭行，則无大過，父母中外，未嘗暫无。禮制得失，古今代有，况師朋屢絕，法豈可常，常法雖備，大略易知，知而不行，非曰善士，見義不為，是謂无勇，勇猛志人，兼弘內外矣。

自知昇過功德訣第三十六

上學積年，必與眾異，精識妙解，久應出羣，德雖未備，所作必知，知其生來，自少及長，動靜之為，有善有惡，惡者悔與不悔，善者積與不積，多少隱顯，分別識之。道足乎心，術足乎驗，體應糜散，心神當知，功行濟世，一死一生，次者三死三生，又次五死五生，又七死七生，又九死九生。品應此者，死不須悲，當剋日時，與眾分別經圖，付授各得其人，躬所佩帶，悉還本師。師已昇度，付洞及淵，所居所服，付物生資，約敕子孫，爰及弟子，貨營齋請，五鍊鎮尸。尸後更生，生或託胎，化生之由，由於先德，加以鎮鍊，施散立功，功轉必速，與道合同。若不及此品，十死十生，百死百生，千死千生，萬死萬生，子子孫孫，為之齋請，布惠行仁，常存拔度矣。若心同上品，術異五條，或身神俱去，或劍杖代留，有隱有顯，垂軌立譽，出經製法，廣濟後

生，不假令人為其齋請也。

上學之曹，身神未得俱去，運應轉輸，皆用捨身之術，鍊神上升，留尸下瘞。瘞之卜地，同墓凡人，不駭於俗，是謂和光。至於密法，潛候山川，設置會神，鎮尸不朽，朽即又生，終與神合。天地不偏，靈祇歸一，地有青龍秉氣，色玄辟非，玄武延軀，虎嘯八垂，則藏尸少時，枯骸更肉，凋藏生華，瘞形又鬱，先神後身，混合為一，鍊易之妙方，成真之要術，精能遵行，福流萬葉矣。

青龍秉氣，上玄辟非，玄武延軀，虎嘯八垂。

夫欲建吉冢之法，去魂後正取九步九尺，名曰上玄辟非，華蓋官王氣神，趙子都冢墓百忌，害炁之神，盡來屬之，能制五土之精，轉禍為福。侯王之家，招搖欲隱，起九尺，庶人五尺，以石方圓三尺，題其文，埋之入土三尺。世間愚人，徒復千條萬章，誰能明吉凶，識四相哉。辟非之下，冢墓由此而成，亦由此而敗，非神非聖，難可明也。必能審此術，子孫无復冢墓之患，能知鎮墓之法，千禁萬忌，一皆厭之，必反凶為吉。能得此法，永為吉冢，不可宣也。

右三尺，題其文曰：天帝告土下冢中王炁、五方諸神、趙公明等，某國帝王公侯官、生民男女甲乙，年如干歲，生值清真之炁，尸歸神宮，翳身冥卿，潛寧冲虛，辟斥諸禁諸忌，不得妄為害炁，當令子孫昌熾，文詠九功，武備七德，世世貴王，與天地無窮，一如土下九天律令。

夫施用此法，慎不可令人知。若立冢墓，王相刑害，諸不足者，一以鎮文厭之，無不厭伏，反凶為吉。范幼冲，漢時尚書郎，解地理，乃以冢宅為意，魏末得道，在童幼中，其云：我今墓有青龍秉炁，上玄辟非，玄武延軀，虎嘯八垂，殆神仙之丘窟，鍊形體之所歸，乃上吉冢也。

辛亥子言：積善愆德，慈心在物，兼修長存之方，洞守形中之寶者，雖有此墓，為以示始終之觀耳。至於神全德全，德會熙鏡玄關，亦何時永為朽物，不復生出耶。此墓之人，斯可謂應運矣。

青童君謂西城真人王君曰：范幼冲上學精專，故能洞達，知其寄尸墓有四相，自言之者，微顯功德，招致有由，獎厲後之至人也。凡身神即令俱舉入道，並名神仙，捨形託死鬼中，立功進學得道，皆號靈人。靈人辛亥子者，亦是漢人，其才識功行，足登聖真，先世罪障，未得都洗，雖有鬼職，尋成高仙，是以了明四相之妙德，前識合者，寶祕勿妄傳也。

洞真太上太霄琅書卷之八竟

#1 按『十惡』疑當作『十善』。

#2 『籍師』二字據文義補。

洞真太上太霄琅書卷之九

大乘行業

（第三十七原缺題）

凡學上道大乘之人，修己化世，勿逃山林。山林絕人，中小避欲，合藥試術，研習奇方，是建德之細，非立功之大基。山中立功無所，所以出世市朝，起創治綰，繕寫經書，宣行妙法，助國濟時，慈心精懃，抑惡揚善，孜孜匪懈，執正治邪，賞罰以中。設法立戒，有不必行，行之剪非，非懲是前，舉一正萬，痛心悲悼，矜愍愚人，致陷此刑，願速改悟，生即能轉，死不促迴，革心悛意，捨闇歸明，如此雖殺，益而無怨，無怨之刑，刑而非殺。聖人不殺，神武之功，世建德，無功德不能立，羣魔惱試，遂不得通，急須諸功，却諸邪醜，眾難悉度，乃獲成真，无功求真，是虛妄之學，如斷足希行，无成步之日矣。

凡修功未滿，遇世凶荒，且應入山，避於危難。當此之時，彌須方術，山有精靈，不可侵犯，亦勿久居，致生厭毒，光怪妄興，飛禍互作，驚恐妖異，疾病中傷，為功輒亂，所向不成。三年可移，擇善棲憩，名山即謁，附名亦然，踐行燒香，存神占卜，啟告玄靈，繕營理經書，人住或異或同，或羣或獨，隨宜製之。醮禮依科，出入如法，遠可千年，不拘得道也。

凡先因宿命，今生山林，或居水側，或處田園，或承前世係嗣相傳，或始兆身緣事致爾，不必是惡，亦未為善，善惡猶行，行業出心，心資行道。道有正科，精思神炁，尋經依師，內事父母，外奉君王，中從師友，正心治身，練籙習妙，勤學不休，出入山水，舟車牛馬，男女貴賤，公私云為，唯存謹慎，華素取中，啟告玄靈，動靜如法，雖居山水，與世不殊。山仁水智，神交乎人，人行仁智，與神合吉，小神相祐，大神護之，久習仁智，仁智弘深，道德禮義，信順咸和，大神小神，同人為一矣。

凡上學居山，處世无異，唯在精心，兼嚴其事。雖居俗境，閒門清室、壇臺堂房、井鼈浴溷，與食香燈，冠衣器物牀席，動靜出入，舟車牛馬畜產，同而有異，各依法制，不可任心乖法，不如俗人，必敗无成，非上人也。上人妙士，和光同塵，挫銳解紛，與俗密異。佩服籙諱，呼吸元精，建德立功，非凡所測。齋謝之後，佩奉真文，所向未合，由罪未原，三的之後，猶當都謝。自天子至于庶人，三品如凡，養育子孫，報祖父之恩。不能報，不知報，報云多計，報事皆罪，人相厭患，非智慧。无智慧必頑塞，不能開通，善不能防閒，惡不能容非，不能忍辱，不能推讓，不能堪苦，不能安貧，不能處樂，樂極則驕，苦極則怨聞父母之聲，憎見尊上之影，日夜僻側，逃而避之。或惡聞子孫之音，嫉害自下形相擲，而擺之以為奇能，矯迹乖法，此罪非智者。宣行神

炁，證明聖教，續種延年，更相生長，更相愛念，更相訓誨，止惡修善，日夜思惟，有過即改，有是堅遵，謙卑居退，不競諍先，諫說勿鬥，借炁養神，和聲怡息，徐語安行，臥坐庠序，所為分明，出入精審，相與還源，治邪保正，却濁來清，削除死籍，注定生名，代人受苦，甘之無怨，度人之樂，節而無荒，不及道悔，不護短申，非諮問勝達，不面從背越，內外相應，智慧人也。智慧之人，可共上學，非智慧者，慎勿與言。言上有罪，動致風刀，閉口慎之，自求多福，福緣相會，智慧相逢。如其無因獨立，樂上遇科，精尋忖度我體先後所行，即今所志與科殊者，急首改之，與科合者，堅固成就。首罪成福，必須結齋，自為為人，隨時消息。巾冠衣服，履板香油，堂室壇墀牀帳，經書供養之具，皆當依科，所須勿闕，非用勿施，華素取中，豐儉守法。法出諸經，不可卒尋，三品所宜，其三科為要。其一、高聖太真五帝四極明科，上下二宮。其二、太玄左宮女青四極三十一卷獨立寶經明科律文，有右中二并左，合三宮。其三、太上九真明科，有上中下三品。其四極明科云：行七經之道，太歲庚辰六月二十五日癸巳己時，北極真公除穢納馨，神遇七經，仁義禮智信及道德。學道期乎至德，至德得乎大道，大道玄邈，涉求迢遙，是以修善，先行仁義禮智與信，遞互相成，始至乎終，相生為次。仁水生火，火生土信，信生義金，金生智水，水生通德，德生達道，道德無極，通達無窮，長生不死，常住湛然，能無能有，最貴最尊。仁亦長生，尚有劫年，義斷禮節，智通信和，五德備者，名曰至德究竟，五千一焉，號為大道。道學七經，經者徑也，由也，常也，正也，成也。徑直易行，由之得進，常通不塞，正以治邪，轉敗為成，經緯相會也。玄素、黃帝、容成、彭鏗、巫咸、陳赦，習學七經，演述陰陽，生生為先，先仁之志，非但七人，七人迹多，亦號七經。天門、玉子，皆傳斯道，外儒失道，不知道為儒本，儒為道末，末本不知，致無長壽之人，遂為淫亂之俗也。至於外儒五經備有，詩首關雎，禮貴婚嫁，傳嗣之重，歷代所同，無後之罪，三千莫大，而不知男女炁數，陰陽興衰，聞之疑怪，嗤鄙成災，良可痛念。智者悟之，能歸內道，救理外儒，詩禮傳易，至于尚書、樂經、孝經，斂末崇本，本孝合乎道，習樂同乎德，德道弘深，仁義備舉，禮智常用，信不暫虧，緣末入本，引外還內，上學之功，於此乎在也。

七經者：

一曰仁經，男女婚嫁恩愛，交接生子種人，永永無絕。

二曰禮經，既生當長，壯不可恣，夫清婦貞，內外分別，尊卑相敬，和而有節。

三曰信經，既知和節，親疏相關，朝野忠直，無相違負。

四曰義經，既知忠直，有與有取，罰惡賞善，更相成濟。

五曰智經，既知賞罰，防有枉濫，抑揚通流，除邪入正。

六曰德經，治邪保正，五德均平，无偏无苦，常樂長存。

七曰道德，常樂長存，勝泰无上，上德不德，教化立功，功成身退，權變无窮。

凡人學道，共修七經，經有所明，各有多少，經恩多，餘事皆少，少不受稱，多故立名。名為仁經，亦有禮義，信智德道，五同若斯，唯道獨多，少行均平，故號大道，一切所宗也。

六道多者，各有所長。

一曰仁道，長於子孫眾多。

二曰禮道，長於敬讓，貪爭止息。

三曰信道，長於誠實，除諸欺華。

四曰義道，長於嚴斷，祐吉剪凶。

五曰智道，長於釋滯，化偽還真。

六曰德道，長於忘功，守正无失，入乎大道。大道无名不去，天人所崇也。

。

凡明內道者，陰陽相交，行炁如數，長短依經，消灾散禍，治病延年，請福結願，求得神仙。雖遍習七經，當隨長救急，行仁之道，以禳逆賊，止諸殺傷，延年多子。行禮之道，消諸凌辱，姦媼去來，口舌讒嫉。行信之道，滅眾怨仇，違負信約，妄語虛言。行義之道，誅剪彊梁，厭伏寇盜，却諸暴凶。行智之道，除邪斷嫌，怨救憂病，益年長筭。行德之道，解諸妬怨，消諸爭名，却妖聲，調雅樂和，五合六七，八九備成，抱一統萬，湛无虧盈。行道之道，无為而為，化物立法，幽顯无遺，變化應運，无極无窮也。

洞真太上太霄琅書春之九竟

洞真太上太霄琅書卷之十

行道去來

得道未去訣第三十八

得道之人，運應化世，未得隱淪，常以本命之日，正中夜半子午之時，說三百六十戒，誦十方徊玄品章，教未得道，同心行之。不知本命，常用甲子清齋入室，坐臥隨人，唯精唯密，必速驗矣。

雲霧子，三月一日生於无量天，年十八，位登太真王。三元下教，朝禮玉天，遂登大有之宮，清齋明霞之館，靈瑞告感，項負圓光。虛皇道君授以琅書，獨誦帝章，掌錄萬仙，上統无崖，下攝无極，自天之下，咸隸太真。太真立科，終始琅書，虛皇玉帝受之九玄，鑄金為簡，刻玉結篇，金縷玉字，祕之九天。太真之王密施行之，周濟十方，分成十卷，三十九章，誦之得通，十卷之

品，又三十九焉。凡修眾經，先習琅書，萬真臨軒，羣魔降伏。雲霧子乃不修他道，唯歌詠帝章，致三元下教，位登太真王，況能兼修諸經，又先精此法，豈不速造玉京，與太上為一乎。太華真人、三天長生君、太和真人、東華老子、南極總司禁君、西臺中侯、北帝中真、九靈玉子、太靈真妃、赤精玉童、玄谷先生、南嶽赤松子、中山王喬、紫陽真人、西城王君、中皇先生、趙伯玄、山仲宗，一十八人，正相傳習之。其餘支流後進，續有得此文者，必充三十六萬之限，保觀金闕聖君，一切无復憂患矣。

太上智慧洞真三寶徊玄十方品章

北方太上頌曰：

太上發玄蘊，煥爛敷真文。落落散天寶，十方所共尊。不始亦不終，不明故无昏。仰登玉京臺，逍遙憩崑崙。超度泉曲都，魔王願欲聞。七祖受化生，解我宿世冤。入控飛玄景，出駕浮紫雲。

東北方太上頌曰：

重暉耀玉晨，乘景開圓明。岌岌洞真殿，晃晃七寶精。一念度八難，長與太上并。纏旋獻黃景，日華虛中生。世知浮俗道，莫聞智慧經。大矣洞真戒，玄感魔王誠。萬劫若一息，豈擊千億齡

東方太上頌曰：

太上體太无，散形渡弱喪。務猷宣玄衛，天真並讚揚。有緣文自表，无因經為藏。若能得此道，首即生圓光，身濟无待律，飄飄逸仙堂。

東南方太上頌曰：

无无竟无永，有有安入妙。天翰蔚无上，玄宗自有要。徊轉三寶輪，十方並震耀。太上觀玉京，魔王空中笑。天帝叉手唱，眾真乘虛嘯。散花正我念，八願自然超。

南方太上頌曰：

靈仙乘慶霄，駕龍躡玄波。洽真表嘉祥，濯足以八河。福應不我期，故能釋天羅。道德觀三界，地網亦以過。感遇靈真會，淨慧經蓮花。

西南方太上頌曰：

无上覺四輩，茫茫大方外。幽顯諒有由，无幽故不昧。來羅運玄輪，真仙萃華薈。時遊渺漭間，天人見无际。

西方太上頌曰：

靈妙寄宣迹；天人有津岸。汎舟不測淵，常恐風波渙。其緣有前力，智勢誰能筭。冉冉任玄樞，昭然實因判。挺穎應真子，靈琴空中彈。淨思恭十方，去留不我羨。

西北方太上頌曰：

太上敷洞文，賢賢歸大緣。蕭條三寶囿，繁華秀我因。伯史與入精，質淨生金身。終劫復始劫，愈覺靈顏新。希度禮无上，靈文降至真。道林蔚天京，下光諸地仙。從容散靈威，洋洋大法宣。

上方太上頌曰：

太上觀十方，晦藹融風穆。圓光口三辰，真人被天服。魔王叉手立，司迎鄴京側。日月翳行曜，七寶煥无極。一切營此時，禍滅地獄息。渺乎无量尊，天人莫能測。

下方太上頌曰：

三寶繁十方，亶亶空中澄。宛轉隨化理，一感法輪昇。冥漠嗷昧間，臺殿悉化成。空有靡不有，巍巍多山陵。太上无滯念，滅念歸幽昇。

凡十方徧玄頌，先始北方，次東，次南，次西，次東北，次東南，次西南，次西北，上方，下方，是謂十方也。若禮拜，亦用此方一拜耳。道學之人正念心禮，則足暢玄志於天尊矣，復何必勞形於風塵哉。

太微天帝曰：夫十方徧玄品者，出乎自然而然，虛峙九千餘劫，其文乃見，元始天王盛而撰焉。總三寶於上清，觀十方於玉京，御大魔於六天，拔苦難於泉曲，訓道學而教業，極天人之幽根，釋宿緣之滯愆，超三界而獨步，何天羅與地網而敢纏耶。儕希微乎自然，故從劫到劫，而弗休矣。煥乎其文，蔚然章矣。實難以言宣，秘而不書，口口相傳，是以單行智慧，不雜眾篇矣。

太微天帝曰：此章品以配大戒，乃三寶之宗矣。常以本命日，說三百部戒，而頌此文，若日中及夜半時修之也。先齋而後行道，慎令不同者聞之，非小故矣。人不知本命，用甲子日，若十年以後，可正月一日行道耳。昔太真王母、東華青童、元始天王，皆太上弟子也，亦但用正月一日，日中及夜半修之耳。太極仙王，其中諸仙公、真人，多以本命辰日行之也。故列而陳之，學士詳用之焉。悉在齋室中，坐臥乃任意為之耳。太上大法，自令北向耳。夫至人則不然矣，或坐亡已淪，夢乎自然，如彈指頃已成外。若俗儒談放，自得於胸衿而已，乃精鍊乎三寶洞文也。是以世業之子，莫見其崖造，故和光於風流矣。

太微天帝曰：正月一日，當呪天羅地網及魔界，脫我身神之道。其法，未平旦小許曰：我明遊上十方，禮見太上尊，九天之羅，敢得落我身。又曰：我將遊下十方，交通地真，提携靈仙，九地之網，敢得維我足。又曰：我將遊太上京，宴適華堂，洞觀諸天，超度三界泉曲之府，勿復留我魂。凡三，正月為之休也。

元始天王曰：自非七世大慶，重華敷條，累葉重柯，秀挺後苗，善逸萬劫，世世有道，名刊金簡，因緣賢應仙合度，何當與戒頌相違耶。其法物同如大戒科，惟當別賚絳文之繒一百三十尺，以代落簪之盟矣，皆奉有文之子也。若

仙人所授，已坦幽昧之故，則弗復須法信。若靈神相告，亦具盟物如法。夫悠悠者，胡以測人心之必然乎。學者當先自審，才志能修之，而終身必不犯明科，乃可從事於大法矣。若違科，七祖幽囚於地獄，身亦禍矣，豈仙之有哉，學士其深慎之焉。故上聖但口誦心存而已，不書其文。

太極大法師曰：五通乃尚在三界，此故未為仙也。夫仙道无不无，有不有，能覺有无之間，泐然於其際而无際，乃能自體六通，超三界也。三界者，一慾界、二色界、三无色界。從太黃皇曾天、太明玉完天、清明何童天、玄胎平育天、元明文舉天、上明七曜摩夷天，第六天為慾界。從虛无越衡天、太極蒙翳天、赤明和陽天、玄明恭華天、耀明宗飄天、竺落皇茄天、虛明堂耀天、觀明端靖天、玄明恭慶天、太煥極瑤天、元載孔昇天、太安皇崖天、顯定極風天、始黃孝芒天、翁重浮容天、无思江由天、上揲阮樂天、无極曇誓天，第二十四天為色界。從皓庭霄度天、至淵通元洞天、太文翰寵妙成天、太素秀樂禁上天，第二十八天為无色界。學三寶，誦徊玄，奉大戒，能超此三界之表，洞六通智慧也。六通智慧者，洞觀、洞聽、洞彼此生死去來劫數、洞十方有无、洞經戒道俗教化、洞自然人身，是為六通大智慧也。學此內法者，皆為太極真人，登玉京，長存永無退，常為太上之賓矣。

太極大法師曰：第九赤明和陽天，又名妙安伽婁天，又名太妙小梵天也。二十九太虛无上常融天、三十太釋玉隆騰勝天、三十一龍變梵度天、三十二太極平育賈奕天，此四天帝君，常誦習三寶經，轉迴玄，奉大戒，修齋清淨，其諸天王亦然，悉共擁護奉戒身，令得仙度矣。故說諸天，名號亦多矣。言无上大羅天，是五億五萬五千五百五十五天之上天也。四天洞叅其炁，故不具說諸天也。然學太上道，案約應知太上玉京，所觀玉京臺，在乎大羅之上，渺渺乎若存若亡，若有若无，渺邈劫仞，難以言宣，故天人弗可思而議矣。

東華青童曰：此道超三界，統六天魔之府。人生死靡不屬泉曲者，而由斯六天，配役太山地獄也。唯得道能度之耳，非大戒，亦復何緣削我之名，永劫而長存乎。非三寶洞文，而當何因為太上之賓友乎。我每侍坐，曾請事於斯語矣。

東華青童曰：魔為數種，有天魔、地魔、人魔、鬼魔。今言六天大魔王者，是天地之大魔王，其宿世有大功德，故得為此魔王，與帝君比德，共執事於天地人，上屬太上玉京，為天帝之下官，且其餘无所不制。夫人學道，先小魔試，道成，待大魔王皆臨大試過，便保舉上玉京臺霄，泉曲幽都，死籍班下，太山除地名之錄也。其各各統職三官，魔神鬼兵直衛，討姦邪魍魎，不正之精魔王，參品仙府，受太上之任矣。並七寶宮殿，煥耀日月，人生死所經也。其政奉大戒，故欲人弘三寶焉。

東華青童曰：夫道學无大戒寶文，子身名終不脫鬼府魔界，七祖亦何由而反胎生宮乎。是以此道至矣，大聖弘之，凡流當不可不懃慕之哉。

已去復來訣第三十九

凡學上道，積功累德，昔因已深，今緣又盛，業行超羣，六通八達，九成十極，與道合源，身神同昇，去世入玄。去而不去，去而更來，來以應感，和光同人。去而不去，无乎不在，在而云去，俗見去也。凡得道，鍊有鍊无，无究有竟，住此即得，得无去就，教迹示階，已得者去，未得者停，及其得者重來，為物行道，非凡所知。知者真聖，聖者復來，心迹叵測，鑽之彌堅，仰之彌高，瞻之在前，忽焉在後，動止出處，默語喜嗔，取與賞罰，生殺是非，黜陟褒貶，皆以利人，制惡還善，迴洙歸源，微妙玄通，深不可識。識之大方，取其行道，屈己申物，損身濟人，誨導不倦，過誤不文，同物過誤，改之有方，有方可師，過則非過，終始垂譽，累代所執，此是已去復來，精加伏懃也。

洞真太上太霄琅書卷之十竟